

Pwuhken SOHP

Oaralap en Pwuhk wet

*Pwuhken Soh*p, iei koasoiepen ohl lelepek men me lokolok laudki eh paisuwedla mwuledek—nah seri kan koaros mehsang, oh eh dipwisou koaros pil salongasang, paliwere unsek pil kenskipeseng soumwahu laud kasaut ehu. Dahme ntingdi nan pwuhk wet kasalehda nan irepen koasokoasoi siluh duwen en Soh

oh kompoakepah kan ar lamalam oh pepehm ong ni paisuwedla wet. Eri, pali laud en audepen koasokoasoipene pwukat iei kupwur en Koht ong aramas akan; oh ni imwilah, Koht pein ketin pwarohng Soh

.

Kompoakepahn Soh

kan eri kawehwehda eh lokolok kan nin duwen soangen lamalam me mehn Suhs kin ahneki sang mahs. Re kin lemeleme me Koht kin ketin katingih wiewia mwahu ahnsou koaros, oh kin ketin kaloke me suwed ahnsou koaros; ih met me kadehdehiong irail me Soh

uhdahn aramas dipan emen. Ahpw Soh

sohte kamehlele met; e kin lemeleme me e sohte konehng en ale soangen lokolok laud wet, pwehki eh pehm me ih aramas mwahu oh pwung men. E sohte kak wehwehki dahme Koht ketin mweidohng soangen paisuwed laudo en lelohng soangen aramas me duwehte ih. Ihme e eimahda oh sohpeiong Koht. Soh

sohte kesehla eh pwoson, ahpw ihte me e ngoangkien, en pwungla mwohn silangin Koht, oh pwurehng waunla nin duwen ohl lelepek men.

Koht sohte ketin sapeng en Soh

eh peidek kan, pwe e ketin kupwukupwurehte eh pwoson, ahpw e ketin kasalehiong Soh

sansal lingan ehu duwen sapwellime

manaman oh erpit. Soh p eri nan kapehd karakarahkala oh pohnesehla sapwellimen Koht erpit oh manaman; e ahpw koluhkihla lokaia sapwung oh laud kan me e patohwandahr.

Kaimwiseklahn ire ko koasoia duwen Soh p eh pwurehng paiamwahula, oh pil paiamwahulahsang mahs. Koht eri ketin angiangihada kompoakepah n Soh p pwehki ar sohte wehwehki kahrepen Soh p eh lokolok. Soh p kelep w me pehmada me Koht lapalapasang dahme aramas kin koasokoasoia duwen ih.

Audepe ni Oaralap

Oaralap 1.1—2.13

Soh p oh kompoakepah kan 3.1—31.40

a. En Soh p eh kaulim 3.1-26

b. Keieun koasokoasoipene 4.1—14.22

c. Keriaun koasokoasoipene 15.1—21.34

d. Kesiluhn koasokoasoipene 22.1—27.23

e. Kapingpen erpit 28.1-28

f. Kaimwiseklahn en Soh p koaso i 29.1—31.40

En Elihu eh kapahrek 32.1—37.24

Kaun-o ketin sapeng Soh p 38.1—42.6

Imwilahn pwuhk wet 42.7-17

Sehdan Song Soh p

¹ Mie ohl emen me adaneki Soh p, me kin kookousoan nan sapwen Us.^a E kin pwongih Koht oh kin poadidiong mehlel. Pil ih aramas mwahu men, oh e kin sohpeisang me suwed ahnsou koaros.

² Nah pwutak isimen oh serepein silimen. ³ E naineki sihpw 7,000, kamel 3,000, kou 1,000, oh ahs 500. E pil naineki lidu tohto, oh e kepwehpwehsang aramas koaros ni palimese.

^a 1:1: US: Wasa kiset sohte nohn dehde wasa e mie.

⁴ Nah pwutak ko kin epwehunki wiahda kamadipw, emenemen kin ahneki ehu ahnsou, ahpw kin luke meteiko koaros en kin iang towehda; oh re kin lukehiong riarail serepein ko ahnsou koaros. ⁵ Mwurin ehuehu kamadipw pwukat, Soh p kin pwourda nimensehngie oh kin wia en ememen nah seri ko ar meirong pwehn kamwakeleirailda. E kin wia met ahnsou koaros pwehki eh kin lemeleme ma emen nah ko seu wiahda dihp ni ar lahlahwe Koht ni ar sohte nsenki.

⁶ Ni rahno eh leledo pwe tohnleng kan en pwarodo mwohn silangin KAUN-O. Sehdan ahpw pil iang uh nann-pwungarail. ⁷ KAUN-O ahpw ketin keinemwe reh, mahsanih, “Dahme ke wiewiaseli?”

Sehdan ahpw sapeng, patohwan, “I kakahnseli wasa kan, pidipidahkih sampah.”

⁸ KAUN-O eri mahsanih, “Ia duwe, ke kilangehr Soh p, ei laduwo? Pwe sohte aramas nin sampah me loalopwoat oh mwahu duwehte ih. E kin kaudokiong ie oh kin kanahieng pwe en dehr wiahda me suwed ahnsou koaros.”

⁹ Sehdan ahpw sapeng, patohwan, “Ia duwe, Soh pahn kak pwongih komwi, ma komw sohte ketin kapaiahda? ¹⁰ Komw ketin silehdier ih oh eh peneinei oh pil mehkoaros me e ahneki. Komw pil kin ketin kupwurahwahwih mehkoaros me e kin wia, oh sapweo direkilahr kou me komw ketikihong. ¹¹ Ahpw ma komw pahn ketikihong mehkoaros me e ahneki—e pahn lahlahwei komwi mwohn silangmwi.”

¹² KAUN-O eri mahsanihong Sehdan, “Eri, me mwahu! Mehkoaros me Soh p ahneki mihlahr pahn omw manaman, ahpw paliwerehte me ke dehr sair.” Sehdan eri patopatohla sang mwohn silangin KAUN-O.

Nein Soh p Seri kan oh eh Kepwe kan Ohla

¹³ Eri, rahn ehu, nindokon nein Sohp seri ko wie kamakamadipw ni imwen me keieu laud rehralo, ¹⁴ a iet sounkair men ahpw tangatang kodohng Sohp oh ndaiong, “Se wie doadoahngki kou kan pwe en dedehk pwelen sapwomwi, oh ahs akan mwengemwengeseli limwaht.

¹⁵ Eri, ni ahnsowohte, mehn Sapea^b kan pwarodo oh wahsang mahn ako. Re ahpw pil kemehla sapwellimomwi lidu koaros. Ngehite me pitla pwe I en kodohn kairehkin komwi.”

¹⁶ Nindokon sounkairo eh lokolokaia, emen ladu ahpw pil leledo oh nda, “Lioal kohdiher oh kemehla sihpw koaros oh pil sileparail koaros. Ngehite me pitla pwe en kodohn kairehkin komwi.”

¹⁷ Ahpw nindokon eh koasokoasoi, emen ladu apw pil leledo oh nda, “Pwihnen mehn Kaldea^c siluh peiongk-itadahr. Re kulihasang kamel koaros oh kemehla sapwellimomwi ladu kan koaros. Ngehite me pitla pwe I en kohdon kairehkin komwi.”

¹⁸ Mwohn eh kaimwisekala eh koasio, emen ladu ahpw leledo oh nda, “Sapwellimomwi pwutak oh serepein koaros wie kamakamadipw ni imwen pwutak me keieu laudo, ¹⁹ a melimel ehu pa ipido sang nan sapwtehn. E ipidohte kauwehla ihmwo. Eri, sapwellimomwi seri ko koaros mehla. Ngehite me pitla pwe I en kohdohn kairehkin komwi.”

²⁰ Sohp eri kesihnendahte tehrpeseng eh likou uwen eh nsensuwed. E ahpw sehkasang pitenmonge ko oh wendiong nanpwel. ²¹ E ahpw ketihtihki, “Sohte mehkot I ahneki ni ei ipwidi, oh sohte mehkot I pahn ahneki ni

^b 1:15: SAPEA: Keinek ehu sang palieir, me kin kohdo pirapahsang aramas akan. ^c 1:17: KALDEA: Keinek ehu sang paliepeng, me kin kohdo pirapahsang aramas akan.

ei pahn mehla. KAUN-O me ketikihong ie mehkoaros, oh met ih me ketikihong ie. Kapinga mware!”

²² Ni mehkoaros me wiawih, Sohph sohte dipikihda eh lahlahwehki Koht.

2

Sehdan Pwurehng Song Sohph

¹ Eri, ni rahn me tohnleng kan pwurehng pokonpene mwohn silangin Koht, Sehdan ahpw pil iang uh nanpwun-garail. ² KAUN-O eri ketin keinemwe reh, mahsanih, “Ke mihmihte ia?”

Sehdan ahpw sapeng, patohwan, “I kakahnseli wasa kan, pidipidahkih sampah.”

³ KAUN-O eri mahsanih, “Ia duwe, ke kilangehr Sohph, ei laduwo? Pwe sohte aramas nin sampah me loalopwoat oh mwahu duwehte ih. E kin kaudokiong ie oh kin kanahieng pwe en dehr wiahda me suwed ahnsou koaros. Ke koangngoangehkin ie I en mweidohng uhk pwe ke en kasongosonge ni sohte kahrepe, ahpw iet Sohph dadaurete nan eh loalopwoat duwehte mahs.”

⁴ Sehdan ahpw sapeng, patohwan, “Aramas kin mweidala mehkoaros me e ahneki pwe en doarehla pein eh mour. ⁵ Ahpw ma komwi ketin kauwehla paliwere—eri e pahn lahlahwei komwi mwohn silangmwi!”

⁶ KAUN-O eri ketin mahsanihong Sehdan, “Me mwahu! En mihla pahn omw manaman; ahpw ihte, ke sohte pahn kemehla.”

⁷ Sehdan eri patopatohla sang mwohn silangin KAUN-O oh kalokehki Sohph kens suwed ehu wasa koaros ni paliwere. ⁸ Sohph eri kohla oh mihmi limwahn kihd ehu, oh e kin korokorehdkihsang nahnen eh kens kan kisin diper en dahl ohla ieu. ⁹ Eh pwoudo ahpw kin ndahng, “Ia duwe,

ke dadaurete nan omw loalopwoatohng Koht? Dahme ke seu lahlahwehki, ke ahpw mehla?”

¹⁰ Sohp ahpw sapeng, nda, “Ke lokolokaiahn lih iahk! Ahnsou me Koht kin ketikihong kitail mehkot mwahu, kitail kin kapingahki. Ia duwen atail pahh kaulimkihla ma e ketikihong kitail apwal?” Eri, nan apwal pwukat koaros Sohp sohte mwahn lahlahwekihla Koht.

Kompoakepahn Sohp kei Pas Reh

¹¹ Kompoakepahn Sohp ohl silimen mie: emen ede Elipas sang kahnimw en Teman, emen sang wehin Sua ede Pildad, a emen ede Sopar sang wehin Naama. Eri, ni ar rong uwen lokolok laud me Sohp wiahier, re inoukipene re en pas reh oh kansenamwawihala. ¹² Ni ar kohkolahng reh, ahpw saikinte nohn karanih, re kilenglahte, kilangada Sohp. Re ahpw sohte ese me iei ih mwo. Ni ar tehkada me iei ih mwo, re tapihada sengiseng. Re ahpw tehrpeseng ar likou kan, uwen ar nsensuwed, oh sipedadahng pwelpar nan wehwe oh pohn moangarail kan. ¹³ Re ahpw mwohndiong nanpwel mpen Sohp, mihmihki wasao erein rahn isuh oh pwohng isipwong, sohte mwahn wia ehu koaso ong Sohp, uwen ar pehmada eh lokolok laud.

3

En Sohp eh Kaulim ong Koht

¹ Mwurin met Sohp ahpw tapihada lokaia oh keriahla rahn me e ipwidi.

Sohp

²⁻³ Maing Koht, komw ketin keriahla rahn me I ipwidio; komw ketin keriahla pwohng me I tepin wiawihda nan kapehd en inei.

- 4 Maing Koht, komw ketin kawekiong ni rotorot rahno.
Komw dehpa mwahn pwurehng tamanda rahno,
de mweidohng marain en dakerada.
- 5 En wiahla rahnen pahtou oh rotorot mosul;
depwek kan en kipehdi oh perehla marain en ketipin.
- 6 Komw ketin irisasang pwohngo
ni wadawad en sounpar oh sounpwong kan;
7 oh ketin wiahkihla pwohng tehn ehu,
me sohte kak kahrehda kisin kansenamwahu kis!
- 8 Komw mahsanihong sounwunahni kan re en keriahla
rahno,
irail kan me kak kamwakid Lepaiadan.^c
- 9 Komw katokehdi usuhn rahn pwe en dehr daker wasa;
komw dehr mweidohng pwohngo en marainpeseng.
- 10 Komw ketin keriahla pwohngo pwehki eh mweidohng I
en ipwidi,
pwehki eh mweidohng I en mihla nan apwal oh
nsensuwed.
- 11 Mehnda I seu mehlahte nan kapehd en ineio,
de ni ahnsou me I ipwidiohte?
- 12 Dahme ei nohno kamwaitkiniehda pohn kepeo,
de kadihdikiniehda pilen eh dihdi?
- 13 Ma I mehlahte ahnsowo, I komkommoalier met,
14 oh I memeirier duwehte nanmwarki oh kaunen
sampah kan,
me kin kauwada sapahl tehnpasarail mering kan.
- 15 Ngehi eri kommoaldier duwehte soupeidi kan
me kin kadirehkihla tehnpasarail kan kohl oh silper,
16 duwehte seri mehla men mwohn eh ipwidi.

^c 3:8: LEPAIADAN: Ekei aramas kamehlele me kieil men met, ekei kamehlele me mahn kamasepwehk en kawa men. Dene sounwunahni kan kin kak wiahiong mahn menet en karotehla ketipin.

- 17 Nan sousou iei wasa me aramas suwed kan kin katokehdi ie ar suwed,
oh me toutoulahr akan kin kommoaldi ie.
- 18 Pil wasao tohn imweteng kan kin diar ie popohl,
re sohte kin rong wasao ngihl keses en sounkamakam.
- 19 Me lapalap oh me tikitik kan kin mihmi wasao, koaruh-sie duwepenehte,
oh lidu kan wasao pil saledeksang ar kaun akan.
- 20 Dahme e mweimweikihong mouren aramas akan en paisuwedla?
Dahme re pahn alehki kamarainparail nan ar nsen-suwed?
- 21 Re kin awiawihodo mehla, e ahpw sohte kin leledo;
re kin mwohneki sousou eh u sang dipwisou kesempwal kan.
- 22 Re sohte kin diar nsenamwahu, re lao kin mehla oh nanpweldi;
23 Koht ketin karirihala sang irail dahme pahn kohdo,
oh pil ketin kapilirailpene oh keleiraildi.
- 24 I sohte kin kangkang pilawa, ihte ahi nsensuwed,
oh I sohte kin tokedihsang ei weirek.
- 25 Mehkoaros me I kin masak de lemmwiki, kin pweida rehi.
- 26 I sohte kak ahneki popohl, de kommoal,
oh ei apwal sohte kin tokedi.

4

Keieun Koasoakoasoipene
(4.1—14.22)

Elipas

- 1-2 Maing Sohph, komw seu pahn nsensuwedkihla ma I
koasoiong komwi?
pwe I solahr kak nennenla.
- 3 Komwi me ketin padahkier aramas tohto,
oh pil kakehlahda pehn aramas luwet akan.
- 4 Ni emen eh kin dipekelekelki eh pwangadahr oh luweta-
lahr,
omwi mahsen kan me kin koangngoangehki en uhda.
- 5 A met, ni apwal eh lelohng komwiher,
komw ahpw sohte kakohng oh kanengamahiong.
- 6 Komw kin pwongih Koht oh omwi mour me mwakelekel
mahso,
eri met, komw pahn likih oh koapworopworki.
- 7 Tamanda mahso. Mie aramas pwung men
me lekdeklahr?
- 8 I kilangehr aramas me kin padok me suwed,
oh kamwarak me suwed, rasehng werentuhke nan-
pwel,
duwen ar kin dolung suwed en ar wiewia kan.
- 9 Koht kin ketin kamwomwkiniraila sapwellime engieng,
rasehng melimel ehu.
- 10 Me suwed akan kin weriwer oh wie ngiringir, rasehng
laion kan,
a Koht kin ketin katokeiraildi oh ketin kauwehla
ngihrail kan.
- 11 Re kin mehla oh neirail seri kan koaros kin tangpeseng,
rasehng laion me sohte kin seike me en kang.
- 12 Pak ehu ngiletik en mahsen pwoat ahpw peidothng ie,
ngehi eri kerenieng sohte kak rongada.
- 13 Likamwete ouraman ehu me kauwehla ei meir.
14 Masak ahpw kipeiehdi, I ahpw wie rerrer;
paliwereiet unsek iang rerrerkihda ei masak.

- ¹⁵ Kisin engitik kis ahpw ipirada pohn meseiet,
ahpw kidkidahrek nan kilih kat.
- ¹⁶ I ahpw kilangada mwohmw ehu me kesikesihnen
mwohi;
mwohmw ehu me sohte nohn dehdeiong ie.
Ngiletik ehu ahpw peidohng ie mahsanih,
- ¹⁷ “Mie aramas emen me kak pwung mwohn silangin Koht
de mwakelekel mwohn silangin Sounwiepe?”
- ¹⁸ Koht sohte kin ketin likih sapwellime lidun nanleng
kan;
e kin ketin diarada sapwung rehn sapwellime tohn-
leng kan.
- ¹⁹ Eri a, ia duwen eh pahn ketin likih wiepen nin lime me
wiawihda sang pwehl,
me tepisang pwehl, rasehng kisin mahn kis me ara-
mas kak padikpene kemehla?
- ²⁰ Aramas kak momour nimenseng,
e ahpw kin mehla mwohn nin soutik; sohte me kin
ese.
- ²¹ Mehkoaros me e ahneki, kohsangehr;
e mehla, ahpw e saikinte loalokongla.”

5

- ¹ Eri, maing Sohph, komw likwer, oh kilang ma mie me pahn
sapeng.
Mie tohnleng men me komw pahn kak sohpeiong?
- ² Ma komw pahn mehkihla pwunod oh nsensuwed,
met wiewiahn pweipwei me sohte katepe.
- ³ I kilangehr me pweipwei kei me mwomwen sohte perki
mehkot,
a I ahpw mwiadang peki Koht en ketin keriahla
dewerail.
- ⁴ Nair seri kan kin mihmi nan apwal ahnsou koaros,

- pwe sohte me kin uhki nan mwoalen kopwung oh doareirailla.
- ⁵ Me duhpeklahr akan pahn kin tungoalehla wahnsapwen me pweipwei kan—
 pil iangahki werentuhke me kin keirda nanpwungen dihpw tekatek—
 oh me kin men nimpildahr akan pahn peirinki ar kepwe kan.
- ⁶ Suwed sohte kin keirda nan pwehl,
 de apwal kin keirda sang nanpwel.
- ⁷ Soh! Pwe aramas kin ipwiding nan apwal,
 duwehte mpwulen kisiniei eh kin luda.
- ⁸ Ma ngehi komwi, I pahn sohpeiong Koht,
 oh peki en ketin sewese ie.
- ⁹ Kitail sohte kak dehdehki soahng kapwuriamwei kan en nin lime,
 oh sohte me kak wadekada sapwellime manaman akan.
- ¹⁰ E kin ketin kamwerekdi keteu pohn sahpw
 oh kin ketin kalamwur mwaht akan.
- ¹¹ Ei, iei Koht me kin ketin kasapwilada me aktikitik kan,
 oh kin ketin kansenamwahwihala koaros me kin nsensuwed.
- ¹²⁻¹³ E kin ketin kasapwungehla koasoandien me mwer-suwed kan,
 oh lidipihkihdi me loalokong kan pein arail koasoandi kan,
 pwe re en dehr kin pweida mwahu ni ar wiewia kan;
¹⁴ pil nin souwas, likamwete re kin alialuseli nan rotorot.
- ¹⁵ A Koht kin ketin kapitala me semwehmwe kan sang mehla,

- oh e kin ketin doaireiraila sang apwal.
- 16 E kin ketikihong me semwehmwe kan koapworopwor,
oh ketin kanennenihala me suwed akan.
- 17 Meid pai aramas me Koht kin ketin kapwungala!
Eri, dehr soikeweisang rehmw sapwellime kopwung.
- 18 Koht kin ketin kamwahwihala ohla kan me pein ih kin
ketikihda;
nin lime me kin kauwehla, nin lime me kin kamwah-
wihala.
- 19 Pak tohto e pahn ketin kasile sang komwi me suwed;
20 ni ahsoun lehk, e pahn ketin doarehla omwi
mour;
oh pil ni ahsoun mahwen, e pahn ketin kapitasang
komwi mehla.
- 21 Koht pahn ketin doarehsang komwi likamw oh karaun
mwahl;
oh pahn ketin kapituhkala ni ahsoun kamwomwla
eh pahn leledo.
- 22 Ni ahsoun mahwen oh lehk lapalap, komw pahn
kokouruhr;
komw sohte pahn masak mahn lawalo kan.
- 23 Sohte takai pahn mie nan sahpw akan me komw kin
koadoahki;
sohte mahn kommwad pahn peiong komwi.
- 24 Komwi eri pahn popohl koukousoan nan imwomwi
impwal;
ni omwi pahn apwahpwalih noumwi pelin sihpw,
komw sohte pahn perki mehkot.
- 25 Noumwi seri kan pahn ngeder,
rasehng dipwen nansapw akan.
- 26 Rasehng wihd me nektehn pahn dondoal,

komw pahn mour lel omwi pahn likeilapala.

²⁷ Maing Sohp, padahk wet se aleier ahnsou reirehie.
Padahk mehlel pwoat met; eri, ale oh doadoahngki.

6

Sohp

¹⁻² Ma ei apwal oh pahtou kan pahn tenekda pohn mehn
tenek kan,

³ re pahn toutou sang pihk en nansed,
ihme kumwail dehr pwuriamweiki ei pato mwahl
akan.

⁴ Koht Wasa Lapalahpie ketin kasikihkinieier arep,
oh pwoisin en arep kan doupesengier nan paliwerei
unsek.

Koht ketin kairakalahr sapwellime wiewia kamasepwehk
kan pwehn uhkihong ie.

⁵ Ahs emen kin nsenamwahuki kangkang dihpw,
oh kou men kin nennenla ni eh kangkang dihpw
meng.

⁶ Ahpw ihs me kak tungoale suhpw nampil, me sohte
soahl?
Ia nemenemen wasa pwetepwet en nan kutoahr?

⁷ I sohte inangih soangen tungoal me duwehte met,
oh I kin soumwahuki soahng koaros me I kin tun-
goale.

⁸ Dahme Koht sohte ketikihong ie dahme I patohwan peki?
Dahme e sohte ketin sapengki ei kapakap?

⁹ E seu ketin wonlahte mwowe oh kemeiehla!

¹⁰ Ma I ese me e pahn ketin kemeiehla, I pahn lusuluski ei
peren,

mehnda ma ei medek me mwuledek.

I patohwan ese me Koht me sarawi;

I sohte mwahn kin uhwong dahme e kin ketin koa-soanehdi.

- 11 Ia ei kehl pwe I en kak momourki?
Dahme I momourki ni eh sohte ei koapworopwor?
- 12 Ia duwe, I wiawihda sang ni takai? Paliwerei wiawihki-hda mete?
- 13 Solahr ei kehl me pahn doareiehla;
solahr wasa me I pahn sohpeila ie oh peki sawas.
- 14 Nan apwal duwehte met, I kin anahne kompoakepahi loalopwoat akan—
mehnda ma I soikalahr Koht de soh.
- 15 Ahpw kumwail, kompoakepahi kan, kumwail pitihiehdi rasehng piletik kan
me kin madada ahnsoun sohla keteu.
- 16 Piletik kan direkihla sinoh oh aihš,
17 ahpw ni ahnsoun karakar re kin sohrala,
oh nan warawar en piletik kan kin ngalantalada oh madekengla.
- 18 Pwihnen seiloak kan kin salongkihla ar raparapahki pihl;
re kin sansalongseli oh mehla nan sapwtehn.
- 19 Pwihnen seiloak kan sang Sipa oh Tema kin raparapahki,
20 ahpw ar koapworopwor kin sohrala limwahn piletik madada kan.
- 21 Kumwail rasehng piletik kan ong ie,
kumwail kilang ei lokolok oh pweikiwei ni masepwehk.
- 22 Dah, I peki kumwail en kihong ie ehu kisakis de pwainohng emen ni tiahk sapwung pwehn sewese ie,
23 de doareiesang imwintihti de emen me ahneki manaman en kaunda ni suwed?

- ²⁴ Eri, kumwail padahkihdo oh kasalehiong ie ei sapwung kan.
I pahn nennenla oh rong kumwail.
- ²⁵ Lokaia mehlel me kehlail,
ahpw amwail koaso kan me soh katepe.
- ²⁶ Kumwail lemeleme me dahme I ndinda duwehte kisinieng;
ahpw ia kahrepen amwail sapeng ei koaso kan en soh koapworopwor?
- ²⁷ Kumwail pahn pil petki lidu sepwoupwou kan
oh kepwehpwehkihla kompoakepahmwail kan!
- ²⁸ Kumwail kilang nan meseiet, I sohte pahn lokaia likamw.
- ²⁹ Kumwail inenen uklahr oh daulihalahr mehlel.
Kumwail tokedihsang amwail mwekid sapahrek kan.
Kumwail dehr kadeikiehda. Pwe ngehi me pwung.
- ³⁰ Ahpw kumwail medemedewe me I likilikamw—
kumwail medemedewe me I sohte kak ese dahme pwung oh sapwung.

7

- ¹ Mour en aramas rasehng doadoahk idihd en sounpei,
rasehng doadoahk apwal en paliwar,
² rasehng lidu men me kin inengieng wasa mwete lemwlemwur;
rasehng tohndoadoahk men me kin awiawih pweine.
- ³ Ehuehu sounpwong kin kohdo oh nekla sohte me I en mourki;
pwohng koaros kin wadohng ie pahtou.
- ⁴ Ni ei kin wendi pwe I en meirla, awa kan kin pwand mehlel;
I kin wekiwekidekseli pwohngo pwon oh kin kasikasik marain en nin sohrahn.
- ⁵ Mwahs kadirehla paliwerei;

e direkihla kens;
nahn kin kohkhsang nan ei ohla kan.

⁶ Ei rahn akan kin imwisekla ni sohte koapworopwor,
imwisekla mwadang sang mwekid en dikek en deidei.

⁷ Maing Koht, komwi ketin tamataman me ei mour duwe-
hte esingek ehu;
ei peren imwiseklahr.

⁸ Kumwail kilikilang ie met, ahpw mwuhr kumwail pahn
sohla kilang ie.

Ma kumwail pahn rapahkin ie, I solahr pahn mie.

⁹⁻¹⁰ Rasehng pelien depwek pali me kin sohla mie oh
sohrala,
aramas emen kin mehla oh sohte mwahn kin
pwurodo;

koaros me kin ese kin manokehla.

¹¹ Soh! I sohte pahn nennenla!
I lingeringerdahr kowahlap.
I uhdahn pahn koaso.

¹² Dahme kumwail sinsilehkin ie?
Kumwail wiahkin ie mahn kamasepwehk en
nansed?^e

¹³ I kin wendi oh song en kommoaldi;
I kin rapahki dahme pahn kamwahwihala ei medek.

¹⁴ Ahpw kumwail kin kamasangkin ie amwail ouraman
kan;
kumwail kahrehiong ie kaudiahl oh ouraman suwed
kan,

¹⁵ ihme kahrehda ei men lusiamala
sang momour nan paliwar suwed wet.

¹⁶ Solahr ei koapworopwor; I pwangadahr momour.

^{7:9-10}: Kupw. 2.1-4. ^e ^{7:12}: MAHN KAMASEPWEHK EN NANSED:
Koasoiepen kawao me dene mahn kamasepwehk en nansed pahn silasildi pwe
re en dehr pitla oh kauwehla wasa.

Kumwail piseksang ie. Solahr katepen ei mour.

- ¹⁷ Dahme komwi nohk kesempwalkihki aramas?
 Dahme komwi kin ketin tetengki eh mwekid kan?
- ¹⁸ Komwi kin ketin kasawih nimenseng koaros
 oh kin ketin songosong ahnsou koaros.
- ¹⁹ Ia duwe, komwi soh kak sohpeisang ie ahnsou kis,
 pwe I en kadallehla pilen eweiet?
- ²⁰ Ia duwe, komwi kupwursuwedkihla dipei kan, iei komwi
 me kin ketin salihedi aramas?
 Dahme komwi ketin wiahkin ie omwi mehn sosohng?
 Ia duwe, I wia wisik toutou ehu ong komwi?
- ²¹ Komwi sohte kak kupwur mahkikihong ie dipei kan?
 Komwi sohte kak meliehla ei sawung kan?
- I nektehn kohdilahng nan ei sousou,
 oh I solahr pahn mie ni ahnsou me komwi pahn ketin
 rapahkin ie.

8

Pildad

- ¹⁻² Komwi kaimwiseklahr omwi lokaiahn kisinieng kan?
- ³ Koht sohte kin ketin wekidala sawwellime kadeik;
 e sohte kin kapweiekidi eh kin ketin wia dahme
 pwung.
- ⁴ Mweinele noumw seri kan wiadahr dihp ong Koht,
 ihme e ketin kalokehkin irail ni me konehng.
- ⁵ Eri, sohpeiong oh pekipek rehn Koht Wasa Lapalahpie;
⁶ ma komwi me mehlel oh mwakelekel,
 Koht ahpw pahn ketido oh sewesei komwi
 oh kapwuredohng komwi tohn imwomwio nin
 duwen keting ehu.
- ⁷ Omwi pai koaros me sohralahr pahn wiahla mehkot
 mwahl

me sohte pahrekiong dahme Koht pahn ketikihong komwi.

- ⁸ Komwi tehk mahs ahnsou kis mwomwen erpit en mahs ako;
medemedewe duwen me mehlel kan me atail pahpa ko wehwehkier.
- ⁹ Atail mour me mwotomwot, sohte mehkot kitail ese; kitail kin sohrala rasehng mwete pohn sampah.
- ¹⁰ Ahpw ohl loalokong en kawa ko en sukuhlih komwi; rong dahme re koasoia:
- ¹¹ “Ahlek sohte kak wosada wasa me sohte pihl;
re sohte kak dierek wasa me sohte pwelmatak.
- ¹² Ma pihl pahn madada, irail me pahn tepin mengila,
ahpw re me nohn tikitik oh sohte kak palidi pwehn wia mehn doadoahk.
- ¹³ Aramas me sohte ar Koht kin duwehte ahlek pwuko;
ar koapworopwor kin sohrala, ni ahnsou ehu me re kin sohpeisang Koht.
- ¹⁴ Re kin koapworopworki selin dereht ehu—pesen likan ehu.
- ¹⁵ Ma re pahn idengekla pohn pesen likan ehu, pesen likano kak kolirailda?
Ma re pahn koledi selin dereht ehu, sahlo kak sewese irail en uhda?”
- ¹⁶ Aramas suwed kin rasehng kisin dihpw me kin wosada pahn ketipin,
rasehng kisin dihpw me kin parpeseng wasa koaros nan mwetuwel.
- ¹⁷ Kalowarail kin pwoalepene takai kan oh kin pwoalepene teng takai koaros.
- ¹⁸ Ahpw song usirailda—

- sohte mwahn emen pahn ese me mie tuhke wasao.
¹⁹ Ei, ih soangen peren pwukat me aramas suwed kan kin ahneki;
 meteikan ahpw kin kohdo oh mihla nan dewerail.
- ²⁰ Ahpw Koht sohte pahn ketin meliehla me loalopwoat akan
 de e sohte pahn ketin sewese aramas suwed kan.
- ²¹ E pahn ketin kupwureikomwihla pwe komwi en kak pwurehng kouruhr oh pereperen,
²² ahpw e pahn ketin kanamenekihala irail kan me kailongkin komwi,
 oh imwen me suwed kan pahn sohrala.

9

Sohp

- ¹⁻² Ei, I rongehr soahng pwukan mahs.
 Ahpw ia duwen aramas emen eh kak powehdi Koht?
- ³ Ia duwen aramas emen eh kak uhwong?
 E kak wia peidek kid
 me sohte emen kak sapeng.
- ⁴ Koht me ketin erpit oh manaman:
 sohte aramas emen kak pelian.
- ⁵ E kin ketin kamwakid nahna kan ni eh sohte kin ketin mweseiseiki
 oh kin ketin kamwomwiraila nan sapwellime engieng.
- ⁶ Koht kin ketikihdo rerrer en sahpw oh itikada pwehl;
 e kin ketin itikada uhr kan me utungada sampah.
- ⁷ E kak ketin katokehdi dakadahn ketipin,
 oh usu kan en dehr lingaling nipwong.
- ⁸ Sohte emen me sewese Koht ni eh ketin wiahda nanleng kan

de tiakidi mahn kamasepwehk en nansedo.^f

⁹ Koht ketin langahda usu kan nan depwek—Diper,
Oraion, Pliadis, oh usu kan en palieir.

¹⁰ Kitail sohte kak wehwehki wiepen nin lime kapwuri-
amwei kan,
oh sapwellime manaman akan sohte kak imwisekla.

¹¹ Koht kin ketin keid limwahi, ahpw I sohte kak kilang.

¹² E kin ketikihda dahme e ketin kupwurki, oh sohte emen
kak kapweiekidi;
sohte me kak eimah en idek reh, “Dahme komwi
ketin wiahki men?”

¹³ Sapwellimen Koht engieng me poatopoa. E kin ketin
tiakpeseng sapwellime imwintihti kan
me kin sewese Rahap,^g mahn kamasepwehk en
nansedo, me kin uhwong.

¹⁴ Eri, ia duwen ei kak sapeng Koht? Dahme I pahn
patohwan?

¹⁵ Mehnda ma I me mwakelekel, ihte me I kak wia,
peki kalahngan sang rehn Koht ei sounkopwung.

¹⁶ Ahpw mehnda ma e ketin mweidohng ie I en pato,
I sohte kamehlele me e pahn ketin karonge ie.

¹⁷ E kin ketikihdo melimel kan pwehn kauweiehla
ni sohte kahrepe.

¹⁸ E sohte ketin mweidohng I en esingek;
e ketin kadirehkihla ei mour nsensuwed mwuledek.

¹⁹ Ia duwe, I en song iding? Song iding Koht?

I en patohwanlahng nan mwoalen kopwung? Ihs me pahn
kak lelki mwoalen kopwung?

^f 9:8: TIAKIDI MAHN KAMASEPWEHK EN NANSEDO: Koasoi en kawa pwoat me dene mahn kamasepwehk en nansed men kamalahr oh tiatihdi (pil tehk 26.13). 9:9: Sohph 38. 31; Eimw. 5.8. ^g 9:13: RAHAP: Mahn kamasepwehk en nansed men kawao me kin wia kilel en pingping oh suwed.

- 20 I me mwakelekel oh loalopwoat, ahpw ei koasoi kan me ngilen aramas dipada men, oh mehkoaros me I kin koasoi kin mwomwen kadeikiehda.
- 21-22 I me mwakelekel, ahpw I solahr katapanki. I pwangadahr momour. Solahr mehkot I katapanki; mwakelekel de dipan, Koht pahn ketin kamwomwk-itaila.
- 23 Ni ahnsou me aramas mwakelekel men kin mehla karuaru, Koht kin ketin kiparamat.
- 24 Koht ketikihongehr sampah rehn me suwed akan. E ketin kakunlahr mesen sounkopwung kan. Eri, ma kaidehk Koht me wia met, a ihs me wia?
- 25 Ei rahn akan kin marahrahn imwisekla, sohte rahn ehu me mwahu.
- 26 Ei mour rasehng wahr me keieu marahra, marahra rasehng paret men me kin pihrdiong pohn kisin mwahmw men.
- 27-28 Ma I pahn sirei oh song en manokehla ei medek, ei lokolok kan kin pwurodo pwehn kamasak ie; I patohwan ese me Koht sohte ketin wiahkin ie aramas mwakelekel.
- 29 Pwehki ei wialahr aramas dipan, dahme I pahn kedirep-wki?
30 Sohte sohpw kak widen sang dipei kan.
- 31 Koht ketin keseielahr nan pwoahr samin ehu, pil ei likou kan namenengkinielahr.
- 32 Ma Koht aramas emen, I pahn kak sapeng; se kak ketila nan mwoalen kopwung pwe se en kapwungala nanpwungat.
- 33 Ahpw sohte emen kak kahkolong nanpwungat—sohte emen kak kapwungala nanpwungen Koht oh ngehi.

³⁴ Maing Koht, komw ketin katokihedi omwi kalokei ie!
Komwi ketikihwei sapwellimomwi mwekid kamasepwehk
kan!

³⁵ I sohte masepwehk. I pahn koaso
pwehki I wehwehki audepen nan kapehdi.

10

¹ I pwangadahr momour.

Komwi ketin karonge ei kaulim ni lingeringer.

² Maing Koht, komwi dehr ketin kadeikiehda.

Komwi mahsanihong ie! Dihp dah me I wiadahr?

³ Me pwung ong komwi omwi kupwur loallapen?

En sautikihla mehkot me pein komwi ketin wiadahr?

Oh mwuhr kiparamatki koasoandien me suwed kan?

⁴ Komwi kin ketin mahsanih soahng kan duwen me kiht
aramas kin patohwan?

⁵ Sapwellimomwi ieias pil mwotomwot duwehte en
kiht aramas akan?

⁶ Eri, dahme komwi kin ketin kilelehkihdi dipei kan koaros
oh ketin rapahkihki ei sapwung kan koaros?

⁷ Komwi mwahngih me sohte dipei,
me sohte emen kak doareiehsang nin limomwien.

⁸ Nin limomwi kan me ketin wiaiehda,
oh met nin limomwi kan me pil kauweiehla.

⁹ Komwi ketin tamataman me komwi ketin kapikiehda
sang pwehl;

eri, komwi pahn ketin kapwureiehla pwe I en pil
wiahla pwelpar?

¹⁰ Komwi ketin karosonehda semeio pwehn wiaiehda;
komwi ketin kakairiehda nan kapehd en inei.

¹¹ Komwi ketikihong tih oh uduk en paliwerei
oh kidimkihla tih kat uduk oh kili.

- ¹² Komwi ketikihongieier mour oh limpoak poatopoa,
oh sapwellimomwi epwel me kolokol ie.
- ¹³ Ahpw met I dehdehkiher me sang ni ahnsowo kohdo
komwi ketin koasoakoasone ni rir en kauweiehla.
- ¹⁴ Komwi ketin mwasamwasahn ma I pahn wiahda dihp,
pwe komwi en dehr ketin mahkikihong ie.
- ¹⁵ Ni ei dipadahr, I diarehr apwal sang rehmwi,
ahpw ni ei wia me pwung, sohte kaping sang rehmwi.
I paisuwedlahr oh nameneklahr kowahlap.
- ¹⁶ Ma I pahn pweida mwahu pak eh,
komwi kin ketin pwakih ie duwehte laion emen;
komwi pil ketin wia sapwellimomwi manaman akan
pwe komwi en kauwehkiniehla.
- ¹⁷ Ahnsou koaros komwi ketin sapwellimaniki sounkade-
hde me pahn uh Wong ie;
omwi engieng pahi kin lalaudla ahnsou koaros;
komwi kin ketin koasoakoasoane ahnsou koaros
ehu soahng tohrohr me komwi pahn ketin
kauwehkiniehla.
- ¹⁸ Maing Koht, dahme komwi ketin mweidikihong ie I en
ipwidi?
E konehngete I en kapilsalehdala mwohn aramas eh
pahn kilang ie.
- ¹⁹ Ei inensangete nan kapehd en inei kolahng nan sousou
mwahusang ei ipwidi.
- ²⁰ Ei mour saikinte pahn imwisekla? Komwi ketin pisek-
sang ie!
Komwi ketin mweidohng ie I en pereperenki mahs
ahnsou me luhwehdi nan ei mour.
- ²¹ I nektehn mweselda oh sohte pahn pwurodo—
kohkolahng nan sahpw ehu me rotorot oh kansen-
suwed,
²² sahpw rotorot, mwetehn, oh pingiping,

wasa me marain wia rotorot.

11

Sopahr

¹⁻² Ia duwe, sohte emen pahn sapeng lokaia soh katepe pwukat?

Lokaia tohto kak kapwungala aramas emen?

³ Soh, ke lemeleme me se sohte kak sapeng komwi?

Me dene omwi lokaia kepweikeng kan pahn kahre-hda at sohla pahn kak lokaia?

⁴ Komwi lemeleme me omwi lokaia kan me mehleh;
komwi lemeleme me komwi me mwakelekel mwohn silangin Koht.

⁵ Ia uwen ei men Koht en ketin sapeng komwi!

⁶ E pahn mahsanihong komwi duwen soahng tohto en kupwurokong;
soahng kei mie me nohn loal me aramas sohte kak wehwehki.

Koht ketin kalokei komwi tikitik sang me konehng komwi en ale.

⁷ Komwi kak diarada imwin oh irepen sapwellimen Koht lapalap oh manaman?

⁸ Sohte irepen pahnlahng ong Koht,
ahpw komwi sohte kak dehdehki.

Koht mwahngih sapwen me melahr akan,
ahpw komwi sohte wehwehki.

⁹ Sapwellimen Koht lapalap siksang mehleh sampah,
tehlap sang sehd.

¹⁰ Ma Koht pahn ketikilahng komwi nan mwoalen kopwung,
ihs me kak kapweiekidi?

¹¹ Koht mwahngih ihs aramas me soh katepe;
e mahsanih arail wiewia suwed kan koaras.

¹² Aramas pweipwei kan pahn tapihada loalokongla

ni ahnsou me ahs lawalo kan pahn ipwidi mand.

- ¹³ Sohph, kapwungala nan kapehdomw. Sohpeiong Koht.
¹⁴ Kesehwei me suwed oh sapwung sang nan imwomw.
¹⁵ Komwi pwurehng uh mwohn sampah, ni kapehd kehlail
 oh tengeteng.
¹⁶ Eri, omwi kahpwal akan ahpw pahn sohrala sang nan
 kapehdomw,
 rasehng lapake me kin sohrala oh sohla me kin
 taman.
¹⁷ Omwi mour ahpw pahn marain sang marain en ketipin
 en nin souwas,
 oh ahnsoun rotorot en omwi mour pahn marain
 rasehng marain en nin sohrain.
¹⁸ Komwi pahn saledok sang apwal oh direkihla koap-
 woropwor;
 Koht pahn ketin doareikomwihla oh ketin kom-
 moaleikomwihdi.
¹⁹ Komwi sohla pahn masak omwi imwintihti kan;
 aramas tohto pahn peki omwi sawas.
²⁰ Ahpw aramas suwed kan pahn kilikilengseli nan ar
 pwunod
 oh diar me sohte wasa kis re kak pitla ie.
 Ihte re pahn kasik mehla en lelohng irail.

12

Sohp

- ¹⁻² Ei, kumwail me ngilen aramas akan.
 Ma kumwail pahn mehla, kupwurokong pahn pil
 iang kumwail sohrala.
³ Ahpw pwehki eh mie ei mehn madamadau duwehte me
 kumwail ahneki;
 I sohte dohsang kumwail ni ire wet;
 aramas koaros wehwehki dahme kumwail ndahier.
⁴ Kompoakepahi kan pil kouruhrkinieier met;

re kouruhr, mehndahte ei pwung oh mwakelekel;
ahpw mie ahnsou ehu me Koht ketin karonge ei
kapakap.

- ⁵ Sohte amwail apwal, ihme kumwail kepitkin ie;
kumwail wokiher aramas emen me nektehn pwup-
wudi.
- ⁶ Ahpw sounpirap akan oh aramas akan me sohte ar Koht
kin momour ni popohl,
mehnda ma ihte ar kehlail me re kin wiahki ar koht.
- ⁷ Pil soahng tohto me menpihr kan oh mahn akan kak
sukuhlihkin kumwail;
⁸ kumwail peki loalokong en mahn en sampah kan oh
mahn en nansed akan.
- ⁹ Irail koaros wehwehki me nin limen KAUN-O me kapiki-
railda.
- ¹⁰ Iei Koht me kin ketin kaweid mour en sapwellime mahn
akan;
mour en aramas koaros kin mihmi nin lime.
- ¹¹ Ahpw nin duwen lowemwen eh kin perenki song nemen
kisin mwenge,
salengomw pil perenki rongorong ngilen mahsen
kan.
- ¹²⁻¹³ Aramas mah ahneki kupwurokong,
ahpw Koht sapwellimaniki kupwurokong oh mana-
man.
Aramas mah kan kin erpit;
Koht sapwellimaniki erpit oh manaman en
kamwakid wasa.
- ¹⁴ Ma Koht pahn kauwehla, ihs me kak pwurehng onehda,
oh ihs me kak kasaledekihala aramas emen me Koht
ketin salihedi?
- ¹⁵ Pihl kin madada, ni ahnsou me Koht kin ketin kap-
weiekidi keteu;

e kin lapakehda ni ahnsou me e kin ketin kadaredi keteu.

- ¹⁶ Koht me ketin roson oh kin ketin powehdi ahnsou koaros;
me likamw oh sounwia likamw koaros kin mihmi pahn sapwellime manaman.
- ¹⁷ E kin ketikhsang kupwurokong en kaun akan
oh kin ketin kupwurehda kaun akan en mwomwen pweipweila.
- ¹⁸ E kin ketin kasapwilidi nanmwarki kan oh salihiraildi;
¹⁹ e kin ketin kahaktikitikihala samworo kan oh aramas lapalap akan.
- ²⁰ E kin ketin kanennenihala aramas likilik kan,
oh ketikhsang kupwurokong en me mah kan.
- ²¹ E kin ketin kanamenekihala me lapalap akan
oh katokihedi kehlail en kaun akan.
- ²² E kin ketin kamarainihada wasa rotorot akan me
rasehng wasa rotorot en mehla.
- ²³ E kin ketin kakehlahda oh ketikihong manaman ong
wehi kan,
ahpw mwuhr e kin ketin kalowehdi oh kamwom-wiraila.
- ²⁴ E kin ketin kupwurehda arail kaun akan en mwomwen
pweipweila
oh ketin mweidohng irail en sansalongseli wasa kan;
²⁵ re dedehmseli wasa nan rot oh wasawasasseli duwehte aramas sakaula kan.

13

- ¹⁻² Mehkoaros me kumwail nda, I rongehr mahs.
I wehwehki koaros; I pil wehwehki duwehte kumwail.
I sohte mihla pahmwail.
- ³ Ahpw I pahn akupwungiong Koht, kaidehk kumwail;

I men rapahki ei pwung pahn kupwure.

- ⁴ Kumwail kidimkihla amwail sawehwe kan likamw;
kumwail duwehte toahkte kan me sohte kak
kamwahwihala aramas.
- ⁵ Kumwail dehr nda mehkot, pwe aramas en lemeleme me
kumwail aramas loalokong kei!
- ⁶ Kumwail rong duwen ei pahn patohwanda ei repen-
pwung.
- ⁷ Dahme kumwail likilikamwki?
Kumwail lemeleme me amwail likamw akan pahn
wia kamwahu ong Koht?
- ⁸ Kumwail songosong en doarehla?
Kumwail pahn lelki sapwellime repenpwung nan
mwoalen kopwung?
- ⁹ Ma Koht pahn ketin kasawih kumwail, e pahn ketin diar
mehkot mwahu rehmwail?
Kumwail lemeleme me kumwail kak pitih Koht
duwehte amwail pitih aramas?
- ¹⁰ Mehnda ma amwail uh Wong me rir,
ahpw e pahn ketin kapwungohng kumwail,
- ¹¹ oh sapwellime manaman pahn kadi-
rehkinkumwailla masepwehk kowahlap.
- ¹² Amwail padahk kan soh katepe rasehng pehs;
amwail akupwung kan me luwet rasehng pwehl.
- ¹³ Kumwail nennenla oh mweidohng ie I en koasoi,
oh I nek pein dolung wahn ei koasoi kan.
- ¹⁴ I onopadahr I en pangala ei mour.
- ¹⁵ Solahr ei koapworopwor, eri ia duwen ma Koht pahn
ketin kemeiehla?
I pahn kasalehda ei repengpwung pahn kupwure.
- ¹⁶ Mweinele met pahn doareiehla,

pwehki eh sohte aramas suwed men kak eimah
mwohn silangin Koht.

¹⁷ Eri, kumwail rong ei pahn sakarada.

¹⁸ I onopadah I en kasalehda ei repengpwung,
pwehki ei ese me ngehi me pwung.

¹⁹ Maing Koht, komwi pahn ketidohn kasalehda ei sap-
wung?

Ma komwi pahn ketin wia met, I onopadah I en
nennenla oh mehla.

²⁰ Komwi ketin mweidohng ie I en peki soahngte riau; eri
komwi ketin kupwure,
oh I sohte pahn song en rukusang komwi;

²¹ komwi ketin katokehdi omwi kalokei ie, oh dehr
kauwehkiniehla masepwehk mwuledek.

²² Maing Koht, komwi ketin mahsen mahs, I ahpw pahn
sapeng.

De mweidohng ie I en pato mahs, komwi ahpw ketin
sapeng.

²³ Ia dipei kan? Ia sapwung me I wiadah?

Ia sapwung me I dipikidah?

²⁴ Dahme komwi ketin rirkisang ie?

Dahme komwi ketin wiahkin ie imwintihti men?

²⁵ Komwi songosong en kamasak ie? I rasehng tehndipw
ieu;

komwi mahmahweniong tehndipw meng ieu.

²⁶ Komwi ketin uhkihong ie kadip kapahtou laud kei,
pwehki dihpa akan me I wiadah ni ei pwulopwul.

²⁷ Komwi ketin salihkidier nehi kan sel mete;
komwi kin ketin mwasamwasahn kahk koaros me I
kin wia,

oh pil kin ketin kasawih lipwen nehi kan.

- ²⁸ Pwehki met, I ahpw ohkilahr rasehng lepin tuhke
mwoasoangoat,
rasehng likou me loangenmwet kangalahr.

14

- ¹ Kitail koaros ipwidi luwet.
Aramas koaros ahneki soangen mourteieu me
mwotomwot oh diren apwal
- ² Kitail kin keirda oh mengidi, rasehng wahnrohs kan;
kitail kin sohrala duwehte mwete.
- ³ Maing Koht, ia duwe, komw pahn ketin kupwukupwure
ie,
de malipeiewohng rehmwi pwe I en pakadeikda?
- ⁴ Sohte mehkot mwakelekel kak kohsang
ni mehkot samin duwehte aramas.
- ⁵ Reireien ahnsoun eh mour kin kileldier mwohn eh pahn
imwisekla—
sounpwong depe e pahn momourki.
Komw ketin kileledier, oh sohte me pahn wekidala.
- ⁶ Komw ketin sohpeiweisang pwe en kelehpwla,
oh mweidohng en pereperenki eh mour apwal, ma e
kak.
- ⁷ Mie koapworopwor nin tuhke pwoat me paldier,
e kak pwurehng mourda oh wosada.
- ⁸ Mehnda ma kalewe kan mahlahr,
oh paliweren tuhkeo mwoasoangotalahr nanpwel,
⁹ pihl kak kawosehda pwe en wiahla tuhke kapw
pwoat.
- ¹⁰ Ahpw aramas emen kin mehla, oh iei met imwilahn
mehkoaros reh;
e kin mehla, oh ia ih met?

- 11 Ahnsou ehu pahn kohdo me pillap akan pahn tokedih-sang pwilipwiliwei,
oh pilen madau kan pahn pil madada,
12 ahpw me melahr akan sohte pahn mourda.
Re soh mwahn pahn pwourda nindokon lahng eh pahn mihmiehte;
re soh mwahn pahn pirida sang ar meir.
- 13 I ahpw men komwi en ketin nekidiehla nan sapwen me melahr akan;
komw ketin karirihiehla, omwi engiang lao tokedi,
komwi ahpw ketin kilelehdi ahnsou me komwi pahn ketin taman ie.
- 14 Ma aramas emen pahn mehla, e kak pwurehng mourda?
Ahpw I pahn awiawihete ahnsou mwahu sang met,
oh kasikasik ahnsou apwal wet lao sohrala.
- 15 Eri, ahnsowo, komw pahn ketin malipe ie, I ahpw pahn patohwan sapeng,
komw ahpw pahn kupwurperenkiniehda, wiepen nin limwomwiet.
- 16 Ahnsowo komw pahn ketin mwasamwasahn kahk koaros en ei mour,
ahpw komw sohte pahn ketin kupwukupwure dipei kan.
- 17 Komw pahn ketin mahkikihong ie dipei kan oh ketin kasohrehla;
komw pahn ketin irisala sapwung koaros me I wiadahr.
- 18 Ahnsou ehu pahn kohdo me nahna kan pahn pwupwudi oh paipalap akan pahn tohrek sang ar wasa kan.
- 19 Pihl kan pahn koupwoarepeseng paip akan,
oh keteu mosul kan pahn kangasang pwelen sahpw akan;

ih duwen omwi kin ketin kasohrehla en aramas ar
koapworopwor ong mour.

- ²⁰ Komw kin ketin powehdi aramas oh kadarala
kohkohlahte;
mese kin mwomwsuwedla ni eh kin mehla.
- ²¹ Nah seri kan kin ale wahu, ahpw e sohte mwahn kin ese;
re kin paisuwedla, a sohte me kin ndahng.
- ²² Ihte me e kin pehm, medek en paliwereo,
oh nsensuwed en nan kapehde.

15

Elipas

Keriaun Koasoakoasoipene

(15. 1—21.34)

- ¹⁻² Sohp, sohte audepen omwi lokaia kan!
- ³ Sohte aramas loalokong men pahn patohwanda soahng
kan me komw patohwandahr
de doarehkihla pein ih soangen lokaia sawehwe kan.
- ⁴ Ma iei duwen omwi koasoandien men, sohte emen pahn
masak Koht;
sohte me pahn kapakapohng.
- ⁵ Omwi mour suwed sansalkidahr dahme komw koasoia;
komw songosong en rirla pahn omwi koasoi en
loalokong kan.
- ⁶ Sohte anahnepen I en kadeingkomwihda;
pein komwi kadeingkomwihda sang ni omwi koasoi
kan koaros.
- ⁷ Komw lemeleme me komwi tepin aramas me ipwidi nan
sampah?
Komw iang pato wasao ni ahnsou me Koht ketin
kapikada nahna kan?
- ⁸ Komw rong duwen sapwellimen Koht koasoandi kan?

Komwi kelehpw me ahneki kupwurokong en aramas?

⁹ Sohte mehkot me komwi ese me se sehse.

¹⁰ Se padahngki at kupwurokong sang rehn me mah kan—sang rehn me ipwidi mwohn semomwio.

¹¹ Koht kupwurki koaloalamwahwih komwi; a dahme komw soikikihla?

Se kin koasoi ni mwaren Koht ni ngihl mwahu, oh meleilei.

¹² Dahme komw mwekidkidahr oh kangkakil kin kiht ni lingeringer.

¹³ Komw lingeringerdahr pahn Koht oh kadeikadahr.

¹⁴ Mie aramas emen me uhdahn mwakelekel?

Mie emen me kak pwung mwohn silangin Koht?

¹⁵ Koht sohte pil kin ketin likih sapwellime tohnleng kan; pwe irail pil sohte kin mwakelekel mwohn silangi.

¹⁶ Oh aramas kin tungoalehla suwed duwehte pihl; ei, aramas ohlahr; sohte katepen aramas.

¹⁷ Eri rong, Soh, I pahn koasoia dahme I ese.

¹⁸ Aramas loalokong kan padahkihongieier me mehleh me re padahngkiher sang samarail ko, oh re sohte ekihla mehkot rir.

¹⁹ Sohte mehn liki kousoan nan sapwarailo; sohte emen me kahluwairail sang pahn kupwur en Koht.

²⁰ Aramas suwed me kin kaloke meteikan pahn lokolok erein eh mour.

²¹ Ngihl kamasepwehk pahn peipeidohng nan salenge, oh sounpirap akan pahn kauwehla ni eh lemeleme me e nsenamwahu.

- 22 Sohte eh koapworopwor en pitsang nan rotorot,
mie kedlahs awiawih wasa kis pwehn kemehla,
23 oh menpihr toantoal en nan sawtehn kan awiawih pwe re en kangala paliwere.
- E wehwehki me rahn kohkohdo kan en eh mour me rotorot;
24 kahpwal, me rasehng nanmwarki manaman emen, awiawih pwehn mahweniong ih.
- 25 Met iei pwais en aramas
me kin rokepene kumwuti ong Koht
oh uhwong Wasa Lapalahpie.
- 26-27 Aramas meno me aklapalap oh kahngohdi;
e kin keptakaila kolokol nah mehn sansar
oh kin mwadangalahng peiong Koht.
- 28 Met iei aramas emen me kin kalowehdi kahnimw kan
oh kalowehdi ihmw akan me towe kan tangehrdoai,
ahpw mahwen pahn kamwomwala kahnimw pwuko
oh ihmw akan.
- 29 E sohte pahn kepwehpwe ahnsou reirei;
eh kepwe kan pahn mwadang sohrasang.
Pil mwetehn paliwere nan pwehl pahn sohrala,
30 oh e sohte pahn pitsang rotorot.
- E pahn rasehng tuhke pwoat
me kisiniei karongelahr rah kan,
me kisinieng ipirasangehr wah kan.
- 31 Ma e pahn pweipwei oh likihala suwed,
eri, suwed pahn wiahla ketingpe.
- 32 Mwohn eh rahn akan eh pahn leledo, e pahn sohrala,
sohrala rasehng rahntuhke me sohte kak pwurehng
wosada.
- 33 E pahn rasehng tuhkehn wain me wah pwul kan pwupwudihsangehr;

rasehng tuhkehn olip me wah kan mweredih-sangehr.

³⁴ Sohte pahn kadaudok en aramas akan me sohte ar Koht, oh kisiniei pahn kamwomwala imwen aramas me kin pwainda mehkot ni ahl sapwung.

³⁵ Ih soangen aramas pwukat me kin wiahda koasoandien kahpwal oh suwed; nan mohngiongirail kin diren mwersuwed ahnsou koaros.

16

Sohp

¹⁻² I rongehr soangen lokaia kan mahs; kansenamwahu me kumwail kihong ie, wia lokolok ehu rehi.

³ Kumwail pahn wie koasoakoasoi kohkohlahte? Sohte pahn imwin amwail koasoi kan?

⁴ Ma kumwail me mi nan dewei, a ngehi nan dewemwail, I kak koasoi mehkoaros me kumwail koasoakoasoi. I kak itikala moangei ni mwomwen loalokong oh kapwilewei ei koasoi.

⁵ I kak kakehlakahkin kumwail ei kaweid oh wiewia koasoi kansenamwahu ong kumwail.

⁶ Ahpw ei koasoi kan sohte kak wia mehn sawas, oh ei nennenla sohte kameleileidi ei medek.

⁷ Maing Koht, komwi ketin katioweielahr; komwi ketin mweidohng ei peneinei en mehla.

⁸ Komwi ketin koliedier; komwi me ei imwintihti. Tih oh kiliet me luhwehdi, oh aramas kin wiahki me met iei kadehdehpen dipei.

⁹ Koht ketin dapengpeseng paliwerei nan sapwellime engieng;

e kin ketin kamoakamoale ie nan sapwellime en-
gieng.

¹⁰ Aramas kin kepitkin ie;

re kin kapiliepene oh pohr meseiet.

¹¹ Koht ketin mweidielahr nan pehn aramas suwed kan.

¹² Mahs I kin momour ni popohl,

ahpw Koht ketin koledier tepinwerei

oh wokih ie oh kauweiehla.

Koht ketin wiahkin ie wasahn sosohng en kesik

¹³ oh kin ketin kadarodohng ie arep sang wasa koaros

—
arep me kin lel ie oh kauweiehla;

ahpw e sohte kin ketin poakeiehla.

¹⁴ E kin ketin kauweiehla pak tohto;

e kin ketin kasikih ie duwehte sounpei men me

sahlielkilah eh lingeringer.

¹⁵ I kin mwahiei oh likawih likoun nsensuwed,

oh lohdiar oh mwomwohd nan pwelpar.

¹⁶ I sengisengehr lao poaren mesei kat weitahtahla,

oh poaren mesei kat mpwospeseng oh toal pahn kilin

mesei kat,

¹⁷ ahpw I sohte dipikihda mwekid suwed ehu,

oh ei kapakapohng Koht me mehlel.

¹⁸ Oh Sampah, ke dehr ekihla sapwung kan me wiawihong
ie!

Ke dehr mweidohng ngilen ei peki sawas en pwuhng en
nennenlahte!

¹⁹ Mie emen me ketiket nanleng

me pahn iangiehla oh uhpalihkin ie.

²⁰ Kompoakepahi kan kin kepitkin ie;

poaren mesei kin kakerehdi pilen mesei ong Koht.

- ²¹ I men emen en sewese ie rehn Koht,
 duwen aramas emen eh kin pekipeki sawas ong
 kompoakepah.
- ²² Ei sounpar akan samwalahr,
 oh I alialu nan ahlo me sohte me kin pwurala mwuri.

17

- ¹ Imwin ei mour kerendohr, I solahr kak esingek;
 solahr ahi mehkot me luhwe, ihte nan sousou.
- ² I kin kilang duwen aramas koaros ar kin kapailokei ie.
- ³ Maing Koht, I kin mehlel. Komwi ketin kupwurehla ei
 pato.
 Sohte emen me utung dahme I patohwan.
- ⁴ Komwi ketin karotongelahr arail lamalam akan pwe re
 en dehr rong mehkan me mie katepe;
 komwi dehr ketin mweidoahng re en pereperenki ar
 poweiehdi.
- ⁵ Nan lepin padahk en mahs ako aramas emen pangalahr
 kompoakepah kan pwehn ale pweipweiki,
 oh nah seri kan ahpw alehki lokolok.
- ⁶ Oh met aramas akan kin doadoahngki lepin padahk
 pwukat pwe re en uhkihong ie;
 re kin kohdo oh kandipih meseiet.
- ⁷ I kereniongehr maskunkihla ei nsensuwed;
 pehi oh nehi kat ahtikitiklahr rasehng mwetehn
 paliweren aramas.
- ⁸ Irail kan me kasik me irail me pwung pwuriamweikihla,
 oh irail koaros kadeikiehda me dene sohte ei Koht.
- ⁹ Irail kan me kasik me dene re me wahu
 kin kamehlele me irail me pwung.
- ¹⁰ Ahpw ma irail koaros kohdo oh uh mwohi,
 sohte emen reh rail me I pahn diar me loalokong.
- ¹¹ Ei rahn akan imwiseklahr; ei koasoandi kan ohlahr;

ei koapworopwor sohralahr.

- ¹² Ahpw kompoakepahi kan kin nda me nipwong iei nin rahn;
re kin nda me marain kerendohr,
ahpw I ese me I mihmihte nan rotorot.
- ¹³ Ihte ei koapworopwor sapwen me melahr akan,
wasa me I pahn wendi meirla nan rotorot.
- ¹⁴ I pahn wiahkihla semei ei sousou,
oh mwahs akan me pahn kangiehla
I pahn wiahkihla inei oh riei serepein.
- ¹⁵ Mie ehu koapworopwor ong ie?
Ihs me kilangadahr ehu?
- ¹⁶ Sohte koapworopwor pahn iang ie
ni ei pahn kohdilahng nan sapwen me melahr akan.

18

Pildad

- ¹⁻² Soh, soangen aramas komwi en sohte kak nennenla?
Ma komw uhdi oh rong, se pahn kak koaso ong komwi.
- ³ Dahme komw lemelemehki me se me nohn pweipwei duwehte kou?
- ⁴ Komw pein kauwehkinkomwilahr omwi lingeringer.
Sampah pahn tehnla pwehki omwi lingeringer?
Koht en ketin kamwakid nahna kan pwe komwi en nsenmwahula?
- ⁵ En aramas suwed men eh marain pahn wie rotorotete;
marain sohte pahn pwurehng lulda.
- ⁶ Lamp en nan imwe pahn wie rotorot.
- ⁷ Mahs e kin sokedi teng, ahpw met e dipekelekelehr;
e pwupwudi—e pwupwudi pahn pein eh kaweid.
- ⁸ E weidlong nan uhk ehu, oh neh kan tengalahr;

- ⁹ lidip ehu koledi keimw en neh kan oh katengehdi.
¹⁰ Lidip ehu ekieklahr nan pwehl;
 lidip ehu kohdiongehr nan ele.
- ¹¹ Kamasepwehk kapilpenehr oh awiawih;
 kamasepwehk wet kin pwakipwakih eh kahk koaros.
¹² E kepwehpwe mahs, ahpw met e duhpeklahr;
 kahpwal kin uh limwah oh awiawih.
¹³ Soumwahu suwed ehu doupesengier ni paliwere
 oh kahredahr peh oh neh kan eh mwoasoangotlahr.
¹⁴ E pehdsangehr nan imwe impwal me e kin saledek sang
 apwal akan loale,
 oh e wurahdeklahnghehr mwohn Nanmwarki Mehla.
¹⁵ Eri, met emen sohte lipilipil kak en kousoanla nan imwe
 impwal—
 mwurin suwepel okohk eh pahn kamweremwer-
 diong loale pwehn kamwakelehda.^h
- ¹⁶ Kalowe oh rah kan mengilahr.
¹⁷ Eh ndand imwiseklahr nan imwe oh wasa teikan;
 solahr emen me taman.
¹⁸ E pahn koakoahk sang nan sapwen me momour kan,
 koakoahk sang nan marain kolahng nan rotorot.
¹⁹ Sohte kadaudoke, sohte emen me luhwehdi.
²⁰ Sang palimese lel palikapi, koaros me pahn rong eh
 lokolok
 pahn rerrerki ar masepwehk.
²¹ Met iei lokolok en aramas suwed,
 lokolok en irail kan me sohte katapanki Koht.

19

Sohp

^h 18:15: PWEHN KAMWAKELEHDA: Mehn mahs akan kin doadoahngki suwepel okohk pwehn kamwakelehda oh kihsang mwahs nan pere kan me aramas kin mehla ie.

- 1-2 Dahme kumwail kapwukapwunodehkin ie mahsen
pwukan?
- 3 Pak tothohie kumwail wia kauweielahr,
oh sohte mwahn namenengki amwail kalokei ie.
- 4 Eri da?
Ma I sapwungalahr, ei pwukoa met.
- 5 Kumwail kin lemeleme me kumwail mwahusang ie;
oh kin wiahki ei apwal kadehdehpen ei dipan.
- 6 Kumwail sohte kak wehwehki me Koht me ketin kup-
wuredahr met?
E ketikidier lidip ehu pwe en ketin kalowehkiniehdi.
- 7 I kin weriwerki lokolok wet,
ahpw sohte mehmen rong ie;
I kin pekipeki ei pwuhng, ahpw sohte diar.
- 8 Koht ketin perehsang ie ahlo, I solahr kak kotehla;
e ketin kipehkidier ahlo rotorot.
- 9 E ketikihsang ie ei kepwe kan koaros,
oh kauwehla lingan en edei.
- 10 E ketin kalipwelipwehda wasa koaros en paliwereiet.
E ketin kanekehsang loalei koapworopwor koaros.
oh ketin mweidala pwe I en luwetala oh mehla.
- 11 Koht ketin kauwong ie sapwellime engieng,
oh ketin wiahkiniehla sapwellime imwintihti la-
palap.
- 12 E ketin poaronehdo sapwellime karis kan pwe re en
mahweniong ie;
re weirda ar wasahn pei oh kapiliepene.
- 13 Koht ketin kupwuredahr riei kan en keseiehla;
mehn liki men ngehi nanpwungen kompoakepahi
kan;
- 14 kisehi kan oh kompoakepahi kan tangehrdoai.
- 15 Mehn keiru kan me mi nan imwei manokeielahr;

serepein kan me kin papah ie pil wiahkinielahr mehn
liki men.

- ¹⁶ Ni ei kin likwerih ladu men, e sohte kin sapeng ie—
ni ei pil kin peki en sewesei ie, e kin nennenlahte.
- ¹⁷ Ei pwoud sohte kakohng engin eweiet;
oh pein riei kan sohte kin men keidohng mpei.
- ¹⁸ Seri kan kin mwamwahlkin ie, oh kin kouruhrkin ie, ni
ar kin kilengiehda.
- ¹⁹ Me keieu kompoakepahkin ie kan kin sautkin ie;
irail kan me I kin keieu poakepoake, re pelianiedahr.
- ²⁰ Kiliet mwotoudier oh mwerekireklahr pohn tih kat;
metehr kis pwe ei mour en lussang ie.
- ²¹ Kumwail kompoakepahi kan, kumwail poakeiehla!
Nin limen Koht pohriedier.
- ²² Dahme kumwail kalokalokehkin ie, duwehte me Koht
ketin wiahiong ie?
Eri da? E saikinte itar amwail kalokaloke ie?
- ²³ I men emen en tamatamante ei lokaia kat
oh ntingihedi nan ehu pwuhken!
- ²⁴ De ei lokaia kat en siseldiong pohn takai,
pwe re en mihmihte kohkohlahte.
- ²⁵ Ahpw iet, I ese me mie mehmen nanleng
me pahn ketidohng sewese ie.
- ²⁶ Pil mwurin kiliet eh pahn ohkihla soumwahu wet,
I pahn kilangki Koht paliwereiet.
- ²⁷ I pahn kilangki pein pwoaren mesei kat,
oh e sohte pahn mwomwen mehn liki men.

Nan kapehdiet tikitingkihla amwail ketihtihki,

²⁸ “A ia duwen atail kak kaloke?”

Kumwail kin raparapahki dahme kumwail pahn kak uhkihong ie.

- ²⁹ Eri met, kumwail en masak kedlahso—
kedlahs me kin wahdo engieng en Koht pohn dihp,
pwe kumwail en esehla me mie emen me kin wia
kadeik.

20

Sopahr

- ¹⁻² Sohph, komw kapwunodeiedahr, I ahpw men
sapengkomwihda.

³ Dahme komw patohwan en, wia lokaiahn kep-
weikeng ehu,
ahpw I ese dahme I pahn sapengkin komwi.

- ⁴ Komw uhdahn patohwan me sang kawao,
ni ahnsou me tepin aramas kohdiong nin sampah,
⁵ sohte aramas suwed men kin nsenamwahu ahnsou
reirei.

- ⁶ Mweinele e kak lapalapala, leldahla pahnlahng,
inemen lapalap oh moange sair depwek kan,
⁷ ahpw e pahn ipirekpeseng duwehte pwelpar.

Irail kan me kin ese ih
pahn medemedewe wasa me e kohla ie.

- ⁸ E pahn sohrala rasehng ouraman ehu, rasehng kaudiahl
ehu nipwong,
me sohte pahn pwurehng sansal.

- ⁹ E pahn sohrasang wasa me e kin kousoan ie;

¹⁰ oh nah pwutak kan pahn kapwungkihla eh
pweipwand mehkan me e pirapahsangehr me
semwehmwe kan.

- ¹¹ Paliwera me kehlail ni eh mwahnakapw,
ahpw mwurin ahnsou kis e pahn wiepwella.

- 12-13 Suwed inenen iou nan ewe
ihme e kin kolokolki ekei nan ewe pwe en kin
songosong nemeneme.
- 14 Ahpw nan kepehde kisin mwenge kin katikala,
katikala rasehng pwoisin.
- 15 Aramas suwed kin mwuskihla eh kepwe me e kin
pirapahda;
Koht kin ketin pwurehng kapwurehsang, pil kap-
wurehsang nan kapehde.
- 16 Me aramas suwed men kin kangala rasehng pwoisin;
aramaso pahn mehkihla rasehng poisin en sineik.
- 17 E sohte pahn mour pwehn kilang pwilipwildohn lehn
olip
de pwilipwildohn milik oh sukehn loangalap.
- 18 E pahn kapwurehla mehkoaros me e koadoahkihada;
e sohte pahn ahneki ahnsou mwahu en pereperenki
eh pai,
- 19 pwehki eh kaloke oh pohnsehse me semwehmwe
kan
oh adihasang ihmw kan me emen tohrohr
kauwadahr.
- 20 E sohte kin itarki eh mehwo.
- 21 Ni eh kin mwenge, sohte kin mie luhwe,
ahpw met eh paiauwahu pahn imwiseklahr.
- 22 Ni eh mwohdalahr pohn eh pai
toutou en eh pwunod koaros pahn kauwehla.
- 23 Mweidohng en kangala mehkoaros me e anahne!
Koht pahn ketin kaloke nan sapwellime engiang
kowahlap.
- 24 Ni eh pahn song en doarehsang pein ih kedlahs mete,
kesik ketieu prons ehu pahn kaskihedi.
- 25 Arep ehu pahn lel pwar paliwere;
oh nta pahn kerekeredi ni imwin arepo,

- oh masepwehk pahn karerehda nan kapehde.
²⁶ Mehkoaros me e nekidalahr pahn mwomwla;
 kisiniei ehu me kaidehn pehn aramas me isikada
 pahn isikala ih oh eh peneinei.
²⁷ Nanleng pahn kasalehda dipen aramas menet,
 oh sampah pahn wia sounkadehdehpen dipe.
²⁸ Eh pai koaros pahn mwomwla
 nan lapake en sapwellimen Koht engieng.
²⁹ Met iei lokolok en aramas suwed,
 lokolok me Koht ketin kilelehiong irail.

21

Sohp

- ¹⁻² Rong dahme I ndinda;
 ihte soangen kansenamwahu me I peki sang rehmwi.
³ Mweidohng ie mahs I en koaso i oh mwuhr,
 ni ei pahn kaimwisakala ei koaso, kumwail nek
 kouruhrkin ie.
⁴ Ei akupwung kaidehn ong aramas;
 mie kahrepe ehu me I solahr kak nennekihla.
⁵ Kumwail kilang ie. Met sohte itar
 kumwail en kilikilang oh nennekihla amwail pwuri-
 anwei?
⁶ Ni ei kin medemedewe dahme wiawihong ie,
 I kin pwuriamweila, oh rerrerki ei masak.
⁷ Dahme Koht kin ketin mweidikihong aramas suwed kan
 en momour,
 mweidohng irail en mour werei oh paiamwahu?
⁸ Re neitik seri oh neirail seri kan pil neitik,
 oh re kin momour pwe re en kilang irail ni ar
 kekeirda.
⁹ Koht sohte kin ketikidohng kahpwal nan imwarail kan;

- re sohte kin ahneki mour kamasepwehk.
- ¹⁰ Ei, neirail kou kan kin kaparapar
oh neitik ni sohte kahpwal.
- ¹¹ Neirail seri kan kin tangseli oh mwardongseli rasehng
sihmpwul kan
¹² oh kahlengki ngilen arp oh keseng pepeuk kan.
- ¹³ Re kin momour ni popohl
oh mehla sohte lokolok.
- ¹⁴ Me suwed kan kin patohwanohng Koht en dehr ketin
kedirepwe irail;
re sohte kin men ese kupwure ong irail.
- ¹⁵ Re kin medemedewe me sohte anahnepen re en papah
Koht,
oh pil sohte kamwahupen ar pahn kapakapohng.
- ¹⁶ Re kin kosekose me dene re pweida sang ni pein ar kehl,
ahpw I sohte kak pwungki arail lamalam.
- ¹⁷ Marain en me suwed akan kin kak kunla?
Mie emen irail kin lelohng apwal?
Koht kin ketin kaloke me suwed akan nan sapwellime
engieng
¹⁸ oh ipirirailla rasehng dihpw meng nan kisinieng,
de pwelpar nan melimel?
- ¹⁹ Kumwail kin kosekose me Koht kin ketin kaloke seri
men pwehki dipen eh pahpa.
Soh! Koht en ketin kalokehki me dipan akan pein diparail
kan;
en ketin kasalehda me e wia met pwehki diparail kan.
- ²⁰ Me dipan akan en pein toutoukihla ar lokolok;
re en pein pehm engieng en Koht Wasa Lapalahpie.
- ²¹ Ni mour en aramas emen eh imwiseklahr,
ia duwe, e kin nsenohki ma nah seri kan nse-
namwahu?

- 22 Mie aramas emen kak padahkihong Koht mehkot,
Koht me pil kin ketin kapwung me lapalap akan?
- 23-24 Ekei aramas kin kekehlailte lao lel rahn me re kin
mehla;
re kin mehla ni nsenamwahu oh meleilei,
paliwararail kan kin kaselelki mwenge mwahu.
- 25 Ekei sohte kin nsenamwahu;
re kin momour oh mehla nan ar kapehd toutou.
- 26 Ahpw koaros duwepenehte me kin mehla oh seridi;
irail koaros mwahs kin kadirehla paliwararail.
- 27 I ese amwail lamalam suwed kan.
- 28 Kumwail kin idek, “Ia imwen ohl lapalapo met,
ohl me kin wia me suwedo?”
- 29 Kumwail koasoiengehr aramas akan me kin seiloak?
Kumwail sohte ese pakair kan me re kin wa kohdo?
- 30 Ni rahn me Koht kin ketin kaloke aramas akan nan
sapwellime engieng,
me suwed kan kin pitla ahnsou koaros.
- 31 Sohte me kin kedipa aramas suwed,
de dupukohng mehkoaros me e wiadahr.
- 32 Ni eh kin wisiklahng wasahn seridi en me melahr akan,
ong ni eh sousou me silasil mwahu,
33 kapar en aramas ngeder kin iang kolahng ni
sousowo,
oh e pil kin wonohn nan pwehl mwuterek.
- 34 Oh kumwail! Kumwail song en kansenamwahwihkin ie
lokaia mwahl!
Pasapeng koaros me kumwail wia me likamw!

*Kesiluhn Koasoakoasoipene**(22.1—27.23)*

- 1-2 Mie aramas emen, me pil keieu loalokong,
me pahn mie katepe ong Koht?
- 3 Omwi wiewia pwung wia kamwahu ong Koht,
de omw wiewia mwahu kin sewese?
- 4 Kaidehn pwehki omwi lemmwiki Koht
me e ketin kapwungkin komwi oh
ketikinkomwilahng mwoalen kopwung.
- 5 Soh, ahpw pwehki omwi dipadahr kowahlap;
oh pwehki soahng suwed kan koaros me komw
wiadahr.
- 6 Pwehn kak kapwungala en riomwo eh pweipwand ong
uhk,
komw kihsang eh likou kan oh sohte ehu luhwe me
en likawih.
- 7 Komw sohte men kanampile irail kan me pwangadahr,
oh kahng kamwenge irail kan me duhpeklahr.
- 8 Komw doadoahngki omwi manaman oh wahu
pwe komwi en sapwenikihla sahpwo pwon.
- 9 Kaidehte liohdi kan me komw kahng sewese,
ahpw komw pil pirapa oh wiakauwe me sepwoupwou
kan.
- 10 Eri met, lidip tohto me kapilkomwipenehr,
oh komw ahpw mwadangete masepwehkada.
- 11 E inenen rotorotalahr oh komw solahr kak patohwan
wasa,
oh lapake ehu koaduhpwalkomwidier.
- 12 Koht soh kin ketiket nanleng ileile kan
oh mahsendiong pohn usu kan, mehndahte ar ileile-
hie?

- 13 Oh met komw ahpw kalelapak, “Dahme Koht mwahngih?
Depwek kan kin karirihala ih—ia duwen e kak ketin kapwungohng kitail?”
- 14 Komw medemedewe me depwek mosul kan kin perehla pwe en dehr mahsanih wasa,
nindokon eh kin ketiketseli pahnlahng.
- 15 Komw koasoanedier komwi en alu nan ahl akan me aramas suwed kan kin keid ie ahnsou koaros?
- 16 Mwohn ar ahnsou eh kin leledo re kin peila nan lapake.
- 17 Ih soangen aramas pwukat me kin soikala Koht oh kamehlele me sohte mehkot me e kak ketin wiahiong irail.
- 18 Ahpw iet pwe Koht me kin ketikihong arail pai— I sohte kak wehwehki lamalam en me suwed akan.
- 19 Aramas mwahu kin nsenamwahu oh aramas mwakelekel kin kouruhr ni ar kin kilang me suwed akan ar kin ale lokolok.
- 20 Mehkoaros me aramas suwed kin ahneki kin mwomwla, oh kisiniei kin isikala mehkoaros me luhwe.
- 21 Eri, Sohpe, peki mahk pahn kupwur en Koht oh tokedihsang wiahki ih omw imwintihti; ma komw pahn wia met, e ahpw pahn ketin kupwuramwahwihkomwihla.
- 22 Ale sawellime padahk kan; oh kolokol sawellime mahsen kan nan kapehdomw.
- 23 Ei, komw pahn akitikitikla oh sohpeiong Koht oh tokedihsang suwed koaros me kin wiewiawi nan imwomw.
- 24 Kesehla noumw kohl koaros; keselahng noumw kohl me keieu kaselel nan warawar en pihl madada kan.

- ²⁵ Koht Wasa Lapalahpie en wiahla noumw kohl,
oh en wia noumw koasoakoasoak en silper.
- ²⁶ Komw ahpw pahn likih Koht ahnsou koaros
oh diarada me iei ih me poahsoan en omw peren.
- ²⁷ Ni omwi pahn kapakap, e pahn ketin sapeng komwi,
oh komw pahn kapwaiada inou kan me komw
wiadahr.
- ²⁸ Komw ahpw pahn pweida ni mehkoaros me komw pahn
wia,
oh marain pahn daker nan elomw.
- ²⁹ Koht kin ketin kasapwilidi me aklapalap akan
oh kin ketin doarehla me aktikitik kan.
- ³⁰ E pahn ketin kapitkomwihla ma komw mwakelekel,
ma omwi wiewia pahn pwung.

23

Sohp

- ¹⁻² I kahngohdiong oh kaulime Koht;
I sohte kak katokehdi ei lipahned.
- ³ Ia uwen ei men rapahki wasa me e ketiket ie,
oh ese ia duwen ei pahn kolahng wasa me ketiket ie.
- ⁴ I pahn kasalehda ei repenpwung mwohn silangi,
oh kasalehda ei kadehde kan pahn kupwure.
- ⁵ I men ese dahme e pahn mahsanih,
oh ia duwen eh pahn ketin sapeng ie.
- ⁶ Koht pahn ketin doadoahngki sapwellime kehl unsek
pwe en ketin uhkihong ie?
Soh, e pahn ketin karonge ei sakarada.
- ⁷ I me mehlel; I kak patohwanohng Koht ei pwung;
e ahpw pahn ketin kasalehda ei mwakelekel met oh
kohkohahte.
- ⁸ I rapahkiher Koht ni Palimese, ahpw e sohte ket wasao;
I sohte diar ni ei rapahki ni Palikapi.

- ⁹ Koht ketin wiewia sapwellime doadoahk ni Paliepeng oh
 Palieir,
 ahpw I sohte mwahn patohwan diar.
- ¹⁰ Ahpw iet pwe Koht mwahngih kahk koaros me I wia;
 ma e pahn ketin song ie, e pahn ketin diarada ei
 mwakelekel.
- ¹¹ I idawehn ni loalopwoat ahl akan me e kin ketin pilada,
 oh sohte kin pireksang loale.
- ¹² I kin kapwaiada sapwellime koasoandi ahnsou koaros;
 I kin idawehn dahme e kupwurki, a kaidehn dahme
 nsenei.
- ¹³ E sohte kin ketin wekidala kupwure. Sohte emen kak
 uhwong
 de kapweiekidi dahme e kupwukupwure en wia.
- ¹⁴ E pahn ketin kapwaiada dahme e ketin koasoanehdi ong
 ie;
 koasoandio iei ehu sang nan sapwellime koasoandi
 tohto me e ketin kupwuredahr;
- ¹⁵ I rerrerki ei masepwehk mwohn silangi.
- ¹⁶⁻¹⁷ Koht Wasa Lapalahpie ketin kauwelahr kehl en nan
 kapehdi.
 Iei Koht me I masakadahr, a kaidehn rotorot—
 mehndahte rotorot eh kakunlahr meseiet.

24

- ¹ Dahme Koht sohte ketin koasoanehdihki ehu ahnsoun
 kopwung,
 ehu rahn en kopwung ong irail kan me kin papah?
- ² Aramas akan kin kamwakid arail pehs kan pwe re en
 kalaudehla sapwarail;
 re kin pirapahda sihpw kan oh kesehlong mpen
 neirail pelinmen kan.
- ³ Re kin kihsang nein me sepwoupwou kan ahs akan,

oh kin kolokol nein liohdi kou lao liohdio pwainla eh
pweipwand kan.

- ⁴ Re kin katokihedi en me semwehmwe kan ar pwung,
oh idingohng me paisuwed kan en tang oh rukula.
- ⁵ Eri me semwehmwe kan, duwehla ahs akan,
me kin raparapahki kisin mwenge nan sapwtehn
madekeng kan;
solahr wasa re kak diar ie kenen neirail seri kan
mwenge.
- ⁶ Re kin koadoahkih mwaht akan me kaidehn arail,ⁱ
oh rikirik kreip nan en aramas suwed mwetin wain
kan.
- ⁷ Re kin meirla nipwong sohte upuhp,
sohte mehкот me re kak perehkihsang irail
lemwulemwur.
- ⁸ Re kin wusekesengkihla keteu sang pohn nahna kan,
re ahpw kin rukula oh kospene pahn paip akan.
- ⁹ Aramas suwed kan kin kaliduwih seri sepwoupwou kan
oh kihsang nein aramas semwehmwe kan seri pwehn
kapwungkihla pweipwand.
- ¹⁰ Ahpw me semwehmwe kan kin kohkohseli sohte likou
mehn pere irail;
re kin duhpekla ni ar kin dondolung wahn pilawa.
- ¹¹ Re kin tiak wahn olip wiahkihda leh,
oh kreip wiahkihda wain,
ahpw pein irail kin men nimpilda.
- ¹² Nan kahnimw kan me soahn oh me pahn melahr akan
kin wie weriwer,
ahpw Koht kin ketin pohnsehse arail kapakap akan.

ⁱ 24:6: MWAHT AKAN ME KAIDEHN ARAIL: Sapwen me semwehmwe kan
kin kohsang irail ni tiahk en mwersuwed, irail ahpw kin uhd idihdohng re en
doadoahkohng meteikan oh ale pweipwei tikitik.

- 13 Mie aramas me kin soikala marain;
 re sohte wehwehki oh sohte men kohla wasa me
 maraino pahn kahluwairailahng ie.
- 14 Sounkam aramas kin pwourda ninsohrahn
 oh kohieila kemehla me semwehmwe kan,
 oh nipwong eh kin pirap.
- 15 Me kin kamwahl akan kin awiawih rotorot en pwohng
 en leledo;
 e kin ekihla mese pwe emen en dehr kilang.
- 16 Sounpirap akan kin wahdpeseng ihmw akan nipwong,
 ahpw ni eh kin rahnpeseng re kin rukusang marain.
- 17 Re kin masak marain en rahn,
 ahpw re sohte kin masak rotorot.

Sopahr

- 18 Lapake kin kapeila aramas suwed,
 oh sapwe kin mihla pahn sapwellimen Koht keria;
 e solahr kin kohla doadoahk nan eh mwetin wain
 kan.
- 19 Nin duwen sinoh eh kin sohrala pahn ketipin oh
 karakar,
 iei duwen me dipan emen eh kin sohrasang nan
 sapwen me momour kan.
- 20 Ine pil kin sohla tamataman ih met;
 mwahs kin kangala oh kauwehla duwehte tuhke me
 pwupwudier.
- 21 Met pweidahr pwehki eh wiakauwe liohdi kan
 oh sohte kesempwalki lih depwen kan.
- 22 Koht, nan sapwellime roson, kin ketin kamwomwala me
 lapalap akan;
 Koht kin ketin mwekid—oh aramas suwed akan kin
 mehla.
- 23 Mweinele Koht pahn kak ketin mweidohng en nse-
 namwahu,
 ahpw e kin ketin mwasamwasahn ahnsou koaros.
- 24 Aramas suwed men kin paiamwahu ahnsou kis,

ahpw mwuhr e kin mengila rasehng dihpw,
rasehng kohn pwoat me lupdier.

²⁵ Mie emen me kak kamahmkihla me met sohte mehlel?
Mie me kak kadehdehda me ei lokaia kan sohte mehlel?

25

Pildad

¹⁻² Koht me manaman; aramas koaros pahn lemmwiki ih;
e kin ketin kolokol wehin nanleng ni popohl.

³ Mie me kak wadekada tohnleng kan me kin papah?
Mie wasa me sapwellimen Koht marain sohte kin daker?

⁴ Mie emen me kak pwung oh mwakelekel mwohn silangin
Koht?

⁵ Maram pil sohte kin marain mwohn silangi,
de usu kan sohte mwakelekel.

⁶ Ahpw ia duwen aramas, me duwehte mwahs, kisin
mensiek?

Ia kesempwal en aramas mwohn silangin Koht?

26

Sohp

¹⁻² Ia uwen laud en omw sawas ong ie—
aramas semwehmwe oh luwet emen ngehiet!

³ Komw kihongieier kaweid mwahu
oh sewesehki soangen aramas pweipwei men nge-
hiet en iang paieki omwi loalokong!

⁴ Ihs me komw lemeleme me pahn rong omwi koasoi kan?
Ihs me audehkin komwi soangen koasoi pwukan?

Pildad

⁵ Ngenen me melahr akan kin rerrer
nan pihl akan pahn sampah.

⁶ Sapwen me melahr akan kin ritidahng Koht;
sohte mehn sansar mehn perehsang silangi.

⁷ Koht ketin katehlapahla pahnlahng en paliepeng
oh tenekihda sampah en langalang nan wehwe.

- ⁸ Iei ih Koht me ketin audehkihla pihl pahnlahng
oh ketin kolokol pwe en dehr toutoula oh wudekpe-
seng.
- ⁹ E kin ketin karirihala maram pahn depwek.
- ¹⁰ E ketin katohrepeseng marain oh rotorot
ni eh ketikihdi irap pwonopwon ehu pohn madau.
- ¹¹ Ni eh kin ketin kamasak uhr kan me utungada pahnlahng
re kin itikekda oh rerrerki ar masepwehk.
- ¹² Iei sapwellime roson me kalowehdi madau;^j
oh nin lime manaman me e ketin kauwehkihla Ra-
hap,^k mahn kamasepwehko.
- ¹³ Engin doause me kamwakelehda pahnlahng,
oh nin lime me kemehla mahn kamasepwehko.^l
- ¹⁴ Ahpw mepwukat iei mehkot tikitik en sapwellime man-
aman,
ihthe ngilen mwenginingin me kitail rongehr.
Ihs me ese ia uhdahn uwen sapwellimen Koht lapalap?

27

Sohp

- ¹⁻² I kahukihla ni mwaren Koht Wasa Lapalahpie me ketin
ieias,
me ketin soikala ei pwung oh ketikihong ie nan
nsensuwed laud—
- ³ erein Koht eh pahn ketin kupwurehkin ie engin
mour,
- ⁴ kilin eweiet sohte pahn patohwan mehkot suwed,
loweiet sohte pahn likamw.
- ⁵ I sohte pahn koasoia me kumwail aramas pwung;

^j 26:12: KALOWEHDI MADAU: Koasoi en kawa pwoat me dene madau mahweniong Koht. ^k 26:12: RAHAP: tehk 9.13. ^l 26:13: MAHN KAMASEPWEHKO: Tehk 9.8.

- I pahn keptakaila koasoakoasoia ei mwakelekel lao
 lel rahn en ei mehla.
- ⁶ I sohte pahn tokedihsang ei repenpwungki ei pwung;
 pwe kadeikpen loalei me mwakelekel.
- ⁷ Irail kan koaros me uhwong ie
 en ale lokolok duwehte me suwed akan, me sohte
 pwung kan.
- ⁸ Ia koapworopwor en aramas akan me sohte ar Koht
 ni ahsou me Koht pahn ketin malipeirail?
- ⁹ Ni ahsou apwal eh pahn lelohng irail,
 ia duwe, Koht pahn ketin karonge ar likwer?
- ¹⁰ Re uhdahn pahn inengieng soangen peren kan me Koht
 kin ketikihda;
 re uhdahn pahn poaden kapakapohng.
- ¹¹ Mweidohng ie I en padahkihong kumwail uwen lapalap
 en sapwellimen Koht manaman,
 oh kawehwehda dahme Koht Wasa Lapalahpie ketin
 koasoanedier.
- ¹² Ahpw soh, pwe pein kumwail kilangehr;
 eri, dahme kumwail wiewiahki lokaia mwahl?
- Sopahr*
- ¹³ Met iei duwen Koht Wasa Lapalahpie
 eh kin ketin kaloke me suwed, sounkam aramas akan.
- ¹⁴ Ele re pahn neitik pwutak tohto,
 ahpw irail koaros pahn mehla nan mahwen;
 kisin mwenge sohte pahn itarohng neirail seri kan.
- ¹⁵ Irail kan me pahn pitla pahn mehkihla soumwahu,
 oh arail pwoud kan sohte pahn mwahieikin irail.
- ¹⁶ Me suwed akan pahn naineki silper tohto me sohte kak
 wadawad
 oh arail likou pahn depasang uwen me aramas kin
 anahne;

- ¹⁷ ahpw ekei aramas mwahu me pahn likawih likou ko,
oh ekei aramas mehlel me pahn nainekihla silper ko.
- ¹⁸ Me suwed kan kin kauwada ihmw rasehng pesen likan
de rasehng imwen kersapw.
- ¹⁹ Ehu rahn re pahn wendi nan arail kepwe kan,
oh ni ar pahn pirida, arail kepwe kan pahn sohralahr.
- ²⁰ Apwal mwuledek pahn lelohng irail rasehng lapake;
kisinieng en nipwong pahn ipiriraila;
- ²¹ kisinieng en palimese pahn ipirirail sang nan
imwarail kan;
- ²² e pahn ipirirail ni mwuledek
nindokon ar pahn nannantihong en tangdoau.
- ²³ Kisinieng pahn pwakih irail nindokon ar pahn tan-
gatang,
kamakamasak kin irail manaman en kamwomwala
wasa.

28

Kapingpen Kupwurokong

- ¹ Mie pwoahr en silper pahn pwehl;
Mie wasahn kamwakelehda kohl.
- ² Aramas kin weirada mete sang pahn pwehl
Oh inim takai oh kapeieisang kahper loale.
- ³ Aramas kin lel wasa me keieu rotorot pahn pwehl.
Re kin wie roporop lellahng pahn kepin sampah
Oh weirada takai sang wasa rotorot.
- ⁴ Dohsang wasa me aramas kin kousoan ie
De wasa me nehn aramas saikinte sok ie
Aramas kin weirada pwoahr loal kan pwe re en rapahki
takai kesempwal kan.
Re kin wie doadoahk nan ar sangat,
Doudouki sahl nan pwoahr akan.
- ⁵ Kisin mwenge kin wosada sang nin sampah,
Ahpw pil pahn kepin sampahohte

Soahng koaros kin ohla oh mwutpene.

⁶ Sapair kin aude takai kan en sampah,
Oh kohl nan pwelpar.

⁷ Sohte likoht kin kilang elen kolahng wasahn dipwisou
kesempwal pwukat,

Oh sohte puldur kin pihr wasa pwuko.

⁸ Sohte laion de mahn kommwad
Kin alu nan ahl tehn pwukat.

⁹ Aramas kin weirada takai me keieu teng,
Weirada nahna kan leldilahng pahn kapi.

¹⁰ Ni ar kin weweir pwoahr kohla nan takai kan,
Re kin diarada kisin takai kesempwal akan.

¹¹ Re kin weiredi lel pahn kepin pihl akan
Oh kin walahng nan marain dahme rir.

¹² Ahpw ia wasa me aramas kak diar ie kupwurokong?
Ia wasa me kitail kak padahngki ie duwen dehdehki?

¹³ Kupwurokong sohte kak dierek nanpwungen aramas
akan;

Sohte me ese ia uwen kesempwalpe.

¹⁴ Pahn kepin madau oh sehd kan

Koasoia me sohte kupwurokong kak dierek wasa pwuko.

¹⁵ Sohte me kak pwainkihda silper de kohl.

¹⁶ Kohl oh kisin takai me keieu kaselel
Sohte pahrekiong kesempwalpe.

¹⁷ E inenen kesempwal sang kohl,
Sang kep en kohl oh kilahs kaselel.

¹⁸ Kupwurokong kesempwal sang
Audepen madau lingan kan de krisdal de rupi kan.

¹⁹ Topas me keieu kaselel oh kohl keieu mwakelekel
Sohte kak pahrekiong kesempwal en kupwurokong.

²⁰ Eri, ia poahsoan en kupwurokong?
Ia wasa me kitail kak padahngki ie duwen dehdehki?

²¹ Sohte mehkot mour kak kilang,
Pil menpihr me pipihrseli kan sohte kak kilang.

²² Pil mehla oh mwomwla
Koasoia me ira rongorongete koasoiepe.

²³ Koht kelehpw me mwahngih ahlo,
Mwahngih wasa me kupwurokong mihmi ie,

²⁴ Pwehki eh ketin mwahngih imwin sampah,
Mwahngih mehkoaros pahnlahng.

²⁵ Ni ahnsou me Koht ketikihong manaman kisinieng
Oh kupwurehda ia pahn laud en madau;

²⁶ Ni ahnsou me Koht kupwurehda wasa me keteu pahn
mweresang ie,

Oh ahl me depwek en nansapwe pahn keid ie;

²⁷ Iei ih ahnsowo me e ketin masanihadada kupwurokong oh
song ia uwen kesempwalpe—

E ahpw ketin kamanahla.

²⁸ Koht eri mahsanihong aramas,

“Pwe kumwail en loalokongla, kumwail uhdahn pahn
lemmwiki Kaun-o.

Pwe kumwail en dehdehki, kumwail uhdahn pahn soh-
peisang me suwed.”

29

Kaimwiseklahn en Sohp Repenpwung

¹ Sohp pwurehng tapihada koaso

Sohp

² I ahpw men ei mour en pwuralahng mahs,
ni ahnsou me Koht kin ketin sinsile ie.

28:23: Par. 3.35-37. 28:27: Sir. 1.9, 19. 28:28: Mel. 111.10; Lep. Pad. 1.7; 9.10.

- ³ Koht ketiket rehi ahnsowo
 oh ketikihong ie marain ni ei weweidwei nan rotorot.
- ⁴ Iei ni rahn pwuko me I paiamwahu
 oh kalahngan en Koht sinsile imwei.
- ⁵ Koht Wasa Lapalahpie ketin ieiang ie ahnsowo
 oh ei tungoal seri kan kapikapil ie.
- ⁶ Ei tungoal kou oh kuht kan kihda milik laud,
 oh ei tuhkehn olip kan wosada wasa takain kan.
- ⁷ Ni ahnsou me mah kan kin tuhpenen nan kahnimwo,
 oh I kin mwohndiong nanpwungarail,
⁸ mwahnakapw akan kin keisang mwohi ni ar kin
 kilang ie,
 oh me mah kan kin kasalehda ar waunekin ie.
- ⁹ Kaunen aramas ako pahn kin tokedihsang ar koaso;
¹⁰ pil me keieu lapalap ako kin nennenla.
- ¹¹ Koaros me kilang oh rong duwen ngehi
 kin koasoakoasoa duwen mwahu kan me I wiadahr.
- ¹² Ni ahnsou me semwehmwe kan peki sawas, I sewese
 irail;
 I sewese me sepwoupwou kan me sohte sawasaparail.
- ¹³ Aramas akan me mihla nan apwal mwuledek, kapinga
 ie,
 oh I rapahkihong lihdi kan sawasaparail.
- ¹⁴ I wia mwekid pwung oh pahrek ahnsou koaros.
- ¹⁵ Ngehi me wia mesen me maskun kan,
 oh nehn me nehtuk kan.
- ¹⁶ I rasehng sahm emen rehn me semwehmwe kan
 oh uhpalihki mehn liki kan me milahr nan apwal.
- ¹⁷ I kauwehla manaman en aramas lemei kan
 oh doarehla me re kahpwalihalahr kan.
- ¹⁸ I kasik me ei mour pahn reirei
 oh I pahn mehla nan imwei ni nsenamwahu.

- ¹⁹ I rasehng tuhke pwoat me kalowe kan kin kelemwur
 ahnsou koaros,
 oh pwoaik kin kalamwur rah kan.
- ²⁰ Aramas koaros kin kapikapinga ie ahnsou koaros,
 oh ei kehl sohte kin ohla.
- ²¹ Ni ei kihda kaweid, aramas akan kin nennenla
 oh rong mwahu dahme I patohwanda;
²² re sohte kin kapatahiong mehkot ni ei kin kaim-
 wiskala ei pato kan.
- Ei pato kan kin lel irail rasehng dingiding en keteu;
²³ koaros kin pwungki ei pato kan
 rasehng soumwet kan ar kin perenda ahnsoun keteu.
- ²⁴ I kin sirei ong irail ni eh kin sohla ar koapworopwor;
 ei mesen nsenamwahu kin kakehlahda kapehdirail.
- ²⁵ I kin ale pwukoa oh koasoanehdi wie lamalam akan;
 I kahluwa irail rasehng nanmwarki men me kin
 kahluwa sapwellime sounpei kan,
 oh kansenamwawihiraila nan ar pwunod.

30

- ¹ Ahpw me pwulopwul sang ie kan kouruhr kin ie met!
 Arail pahpa ko ohl soh katepe kei;
 ihme I sohte kak mweidikihong re en iang nei kidi
 kan sile nei sihpw kan.
- ² Irail pwihn sakanakan oh soh katepe kei,
 inenen luwet en iang wia ei doadoahk.
- ³ Re inenen semwehmwe oh kin men mwenge;
 re pil kak kangada kalowen tuhke meng—
 nipwong, nan sapwtehn, nan sahpw me sohte
 mehkot loale.
- ⁴ Re usada dipwen nan sapwtehn oh kang,
 re pil kang kalowen tuhke me sohte nemeneme!
- ⁵ Aramas akan wering irail oh pwakihiraila,
 rasehng ma re weriwering sounpirap akan.

- ⁶ Re kin kousoan nan pwoaren paip akan,
nan pwoahr me weiweida ni keilen paip akan.
- ⁷ Re weriwer duwehte mahn en nanwel akan
oh wendi kospene pahn dihpw kan!
- ⁸ Pwihn soh katepe oh sohte wadarail!
Re peukeussang nan sahpwo.
- ⁹ Eri, met re kodohn kouruhrkin ie;
sohte ngehi mehkot, ahpw ihte arail mehn kepit.
- ¹⁰ Re sautikin ie;
re medemedewe me re mwahu sang ie,
oh re pil kin kendipiong ni mesei.
- ¹¹ Pwehki Koht eh ketin kaluweteiehla oh kapaisuwedihiehla,
re uhkihong ie arail lingeringer.
- ¹² Pwihn wet kin uhwong ie wasa koaros me I kin kohla ie;
re kin pwakih ie; re onopadahr soahng suwed me re
pahn wiahiong ie.
- ¹³ Re sopukiehla oh song en kauweiehla;
oh sohte emen me pahn katokihiraildi.
- ¹⁴ Re duwallong nan pwoahr me perepere ie
oh tangodohng pohi;
- ¹⁵ I rerrerki ei masepwehk;
ei wahu sohralahr rasehng tumwenieng ehu,
oh ei pai sohrala rasehng pelien depwek pali.
- ¹⁶ Eri, met I nektehn mehla;
sohte maiauda en ei lokolok.
- ¹⁷ Tih kat koaros kin medek nipwong;
medek me kin doakoadoako ie sohte tokedi.
- ¹⁸ Koht ketin koledier tepinwereiet
oh waikpesengier ei likou kan.
- ¹⁹ E ketin keseiedier nan pwelmatak;
I sohte siksang pwehl.

- 20 Maing Koht, I patohwan likweriong komwi, komwi
ahpw sohte ketin sapeng;
oh ni ei kapakap, komwi kin ketin pohsehse.
- 21 Komwi ketin wiakauweielahr;
komwi ketin kalokehkin ie sapwellimomwi mana-
man unsek.
- 22 Komwi ketin mweidohng kisinieng en ipiriehla;
komwi ketin keseieseli nan melimel laud.
- 23 I patohwan ese me komwi pahn ketin pangielahr ong
mehla,
imwilahn mehkoaros me momour.
- 24 Dahme komwi mahwenkihong aramas emen me ohlahr,
me sohte kin wia mehkot pwe ihte peki kup-
wurkalahngan?
- 25 I seu kin iang aramas akan sengiseng ni ahnsou apwal,
de nsensuwedkihla irail kan me paisuwedlahr?
- 26 I koapworopworki peren oh marain,
ahpw apwal oh rotorot me lelohng ie.
- 27 I ohkilahr kowahlap pwunod oh medek;
rahn koaros I kin wie lokolok.
- 28 I kin kohkohseli diren nsensuwed, sohte kamarainpei;
I kin uh nan pokon oh pekipeki sawas.
- 29 Ngilei me diren pahtou oh sangat
rasehng ngilen kidi en wel oh osris.
- 30 Kiliat toantoallahr; I mwasingkilahr soumwahu
karakar.
- 31 Mahs I kin rongorong ngilen keseng kaperen,
ahpw met I kin rongorongete ngilen mwahiei oh
sengiseng.

31

- 1 I wiadahr inou lapalap ehu:
I en dehr kin kangkakil serepein men ni ineng suwed.
- 2 Dahme Koht, Wasa Lapalap, kin ketin wiahiong kitail?

- Ia duwen eh kin ketin katingih wiewiahn aramas akan?
- ³ E kin ketikihong irail akan me kin wiahda dihp paisuwed oh kalokolok.
- ⁴ Koht ketin mwahngih ei wiewia kan koaros, e kin ketin tehk kahk koaros me I kin wia.
- ⁵ I kak kahukihla me soh mwahn sapwung laud ehu I wiahda, I soh mwahn song en pitihedi meteikan.
- ⁶ Koht en ketin tenekih ie ni sapwellime mehn tenek en pwuhng, e ahpw pahn ketin mwahngih uwen ei mwakelekel.
- ⁷ Ma I sapwungala katiasang nan ahl pwung; de mweidala pein ngehi ong ni me suwed; ma pehi kat saminkilahr dihp,
- ⁸ eri, wahnsapwei koaros en ohla, de aramas teikan en pwaisanki kisin tungoal kan me I kin koadoahkihada.
- ⁹ Ma poakepen en mehn mpei eh pwoud kaloweiedier, oh ma I rukula, awih pahn wenihmwun imwe,
- ¹⁰ eri, ei pwoud en kin kaunopada mwenge ong emen ohl tohröhr, oh pil wendi mpe.
- ¹¹ Pwe soangen suwed wet pahn alehki kalokepen kamakamala.
- ¹² E pahn rasehng kisiniei en nan ehl, me kin karoangehla oh kamwomwala mehkoaros me I ahneki.
- ¹³ Ahnsou me emen ei ladu kan kin kaulime ie, I pahn kin rong oh wie me mwahu ong.
- ¹⁴ Pwe ma soh, ia duwen ei pahn uh mwohn silangin Koht?

Dahme I pahn kak sapengki Koht ni eh pahn ketidohn
kadeikiehda?

¹⁵ Pwe pein Kohtohte me ketin wiaiehda,
iei ih me pil ketin wiahda ei ladu kan.

¹⁶ I sohte mwahn soikala pekipek en me semwehmwe
men,

I sohte mwahn kauwehla koapworopwor en liohdi
men,

¹⁷ oh sohte sepwoupwou men me duhpekla nindokon
ei reken mwenge.

¹⁸ Erein ei mour unsek I kin apwahpwalih soangen aramas
pwukat.

¹⁹ Ni ei kin diar emen nan eh anahn laud
pwehki eh nohn semwehmwe oh sohte kak pwainda
eh likou,

²⁰ I kin kihong likou me kin wiawihsang
ni wunen nei pelin sihpw kan.

E ahpw kin kapingakin ie sang nan kapehde unsek.

²¹ Ma I pitihedi me sepwoupwou men,
pwehki ei ese me ngehi me adamwahu ni mwoalen
kopwung,

²² eri, pehi kat en rihsekpeseng,
pwopweiet en dapengeksang nan dewe.

²³ Pwehki ei masak kalokolok en Koht,
I sohte kak wiahda soahnget.

²⁴ I sohte mwahn kin koapworopworki dipwisou kan,

²⁵ de kin aklapalapkihla ei kepwehpwe.

²⁶ I sohte mwahn kin pwingih ketipin ni eh kin daker
wasa,
de maram me kin dak lingaling.

- 27 I sohte kin sapwungala oh pwongih ira
ni ei pahn metik pehiet ni tiahk en waunekin ira.
- 28 Kaloopen soangen dihp pwukat, iei kamakamala,
pwe e kin kasohwe Koht, Wasa Lapalap.
- 29 I sohte mwahn kin perenkihda paisuwedlahn ei imwin-
tihti kan,
de nsenamwahukihla ar kin mihla nan apwal laud;
30 I sohte mwahn dipkihda ei kin kapakapkin irail
pwe re en mehla.
- 31 Aramas koaros me kin doadoahkohng ie ese mwahu
duwen ei kin kasamwo mwahu mehn keiru kan
ahnsou koaros.
- 32 I kin kasamwolong nan imwei me seiloak kan,
I sohte kin mweidohng re en kin keiruhdi naniel
akan.
- 33 Aramas teikan kin song karirihala diparail kan,
a ngehi, I soh mwahn kin ekihla dipei kan.
- 34 I soh mwahn kin masak lokaiahn aramas akan;
I sohte kin nennenla de ruksang irail
pwehki ei masak re dehr kasaroweiehdi.
- 35 Ia duwe, sohte me pahn rong dahme I ndindaht?
I kahukihla me ei lokaia kan koaros me uhdahn mehlel.
Koht, Wasa Lapalap, en ketin sapeng ie.
- Ma ei imwintihiti pahn ntingihdi dipei kan
nan pwuhk pwe I en kilang,
- 36 mehlel, I pahn perenkihda kidahng pohn moangeiet,
oh kolada pwe aramas koaros en kilang.
- 37 I pahn patohwanohng Koht mehkoaros me I wiadahr,
oh patohwan uh mwohn silangi ni eimah.
- 38 Ma I pirapahda sahpw me I kin wie sapwasapw loale,

oh adihasang me uhdahn sapwe sahppo—
³⁹ ma I tungoalehla wahnsahppo,
 a sounsapwasapw akan me koadoahkihadahr ahpw
 duhpekla—
⁴⁰ eri, sahppo en kakairada dihpw tekatek oh dihpw
 suwed,
 en dehr kihda wahn pilawa oh parli.

Imwilahn en Sohpo eh koaso.

32

En Elihu Kapahrek (32.1—37.24)

¹ Pwehki Sohpo eh ngidingidki eh mwakelekel, ohl silimeno ahpw sohla song en sapeng ih. ² Ahpw ohl emen me ede Elihu me iang mihmi wasao ahpw sohla kak kanengamahiong eh lingeringer, pwehki Sohpo eh akupwungki pein ih oh kapwukohnki Koht mehkoaros. (Elihu nein Parakel pwutak, kadaudok en Pus, oh kisehn peneineien Ram.) ³ E pil lingeringer pahn kompoakepahn Sohpo ohl silimeno. Ar sohte kak sapeng Sohpo, oh met likamwete Koht me sapwung. ⁴ Pwehki Elihu me keieu pwulopwul wasao, kahrehda e sohte iang pato lao irail kaimwisakala arail pato kan. ⁵ Ni eh patohwan me ohl silimeno sohte kak sapeng Sohpo, e ahpw lingeringerda ⁶ oh tapihada pato.

Elihu

I me pwulopwul, a kumwail me mah,
 eri, I masak patohwanohng kumwail dahme I medemedewe.
⁷ I medemedewe me kumwail me uhdahn pahn mahsen,
 kumwail me mah kan uhdahn pahn sawaski amwail
 kupwurokong.

- ⁸ Ahpw iet pwe ngenen Koht Wasa Lapalahpie
me kin ketikidohng aramas kupwurokong.
- ⁹ Kaidehn aramas ar kin mahla me kahrehiong ar kin
kupwurokongla
de kahrehiong ar pahn ese dahme pwung.
- ¹⁰ Eri, met I men kumwail en karonge ie mahs;
I pahn patohwanohng kumwail ei tungoal lamalam.
- ¹¹ I nennenla rongorong nindokon amwail mahmahsen
oh awiawih amwail raparapahki mahsen en kup-
wurokong kan.
- ¹² I tehk ni keneinei, I ahpw diarada me kumwail sohte
pweida;
kumwail sohte kasapwunge dahme Soh p koasoi aier.
- ¹³ Ia duwen amwail kak koasoi me kumwail diaradahr
kupwurokong?
Koht uhdahn pahn sapeng Soh p, pwe kumwail sohte
kakohng.
- ¹⁴ Soh p mahseniong kumwail, e sohte mahseniong ie,
eri, ei pasapeng sohte mwahn pahn duwehte amwail.
- ¹⁵ Maing Soh p, arail koasoi kan sohte wia sawas ehu;
sohte me re kak sapengkin komwi.
- ¹⁶ Ia duwe, I en awiawih ni arail nennenlahr?
Re kesikesihnenehr solahr me re pahn koasoi.
- ¹⁷ Soh, I pahn wiahier pein ei pasapeng met
oh patohwanohng komwi dahme ei tungoal
lamalam.
- ¹⁸ I solahr kak nennenla.
I solahr kak kolokol ei pato kan.
- ¹⁹ Ma sohte ei ahnsou mwahu en pato,
I pahn sawapeseng rasehng edin wain me direkihla
wain kapw.
- ²⁰ I solahr kak kanengamah; I uhdahn pahn pato.

- ²¹ I sohte pahn uhpalihki emen nan akupwungpene wet;
I sohte pahn kapinga emen.
- ²² I sohte kin ese mwomwen lokaiahn kaping,
oh Koht pahn mwadangete kalohei ie ma I pahn wia
met.

33

- ¹ Eri, Sohþ, komw karonge kanahieng
mehkoaros me I pahn patohwan.
- ² I onopadahr I en patohwanda ei tungoal lamalam.
- ³ Ei pato kan koaros me mehlel,
oh I koasoakoasoia dahme mehlel.
- ⁴ Ngenen Koht me wiaiehda oh ketikihong ie mour.
- ⁵ Sapeng ie ma komw kak. Kaunopada omwi akupwung
kan.
- ⁶ Kita duwepenehte mwohn silangin Koht,
kita koaros wiawihda sang pwehl.
- ⁷ Eri, sohte kahrepen omwi pahn masak ie;
I sohte pahn poweikomwihdi.
- ⁸ Eri, iet dahme I rongehr sang komwi:
- ⁹ “I sohte wiahda dihþ; I sohte wiahda mehkot sapwung.
I me mwakelekel oh sohte dipei.
- ¹⁰ Ahpw Koht ketin rapahki dahme e pahn ketin uhkihong
ie
oh wiahkin ie sapwellime imwintihti.
- ¹¹ E ketin salihkidier nehi kan sel mete;
oh e kin ketin mwasamwasahn kahk koaros me I kin
wia.”
- ¹² Ahpw I pahn patohwanohng komwi, Sohþ, me komwi
sapwung.
Koht ketin lapalapasang aramas koaros.

- 13 Dahme komwi kapwukohnekihki Koht
me dene e sohte kin ketin sapeng en aramas kaulim
kan?
- 14 Mehnda ma Koht kin ketin mahsen ahnsou koaros,
ahpw sohte me kin tehk dahme e kin mahsanih.
- 15 Ni aramas ar kin meir nipwong,
Koht kin ketin mahsen nan ouraman oh kaudiahl
kan.
- 16 E kin ketin kupwurehda pwe re en rong dahme e
mahsanih,
oh re kin masakada sapwellime mahsen kan.
- 17 E kin ketin mahsen pwehn katokihedi diparail kan
oh en ketin doaireirailla pwe re dehr aklapalapala.
- 18 E sohte kak ketin mweidohng re en mwomwla;
e kin ketin kapitirailsang mehla.
- 19 Koht kin ketin kapwungala aramas ni eh kin ketikihdo
souwahu,
oh kadirehkihla paliwere medek.
- 20 Aramas souwahu men kin sohla men tungoale
mehkot,
oh pil sohla kin men tungoale kisin tungoal me keieu
mwahu.
- 21 Paliwere kin tihtihla;
komwi kak kilang tih koaros;
22 e nektehn kolahng nan sapwen me melahr akan.
- 23 Mweinele tohnleng men pahn ketido sewesehda—
emen sapwellimen Koht tohnleng ngeder kan,
me kin katamanki aramas arail pwukoa.
- 24 Sang ni sapwellime kalahngan e ahpw pahn mahsanih,
“Pweisang!
E sohte pahn kolahng nan sapwen me melahr akan.
Iet pweinen eh pahn kasaledekla.”

- ²⁵ Paliwere pahn pwurehng pwulopwula oh kehlailla;
²⁶ Ni eh pahn kapakap, Koht pahn ketin sapeng;
 e pahn pwongih Koht ni peren;
 Koht pahn ketin pwurehng kapwungala mehkoaros
 reh.
- ²⁷ E ahpw pahn patohwanda nan pokon sansal, “I di-
 padahr.
 I wiadahr me sapwung, ahpw Koht ketin doareiehla.
- ²⁸ E ketin nekinekid ie pwe I en dehr kolahng nan sapwen
 me melahr akan,
 eri, iet I momourte.”
- ²⁹ Koht kin ketin pwurupwurehng wiewia mepwukat;
³⁰ e kin ketin doarehla mour en aramas emen,
 oh ketikihong en kin perenki eh momour.
- ³¹ Eri, Soh p komwi karonge dahme I koasoakoasoia;
 nennenla oh mweidohng ie I en pato.
- ³² Ahpw ma mie mehkot me komwi men koasoia, eri, I
 pahn rong;
 I pahn perenki koasoia me komwi me pwung.
- ³³ Ahpw ma soh, nennenlahte oh karonge ie,
 I ahpw pahn padahkihong komwi duwen kup-
 wurokong.

34

- ¹⁻² Aramas ekei kumwail en me inenen loalokong oh
 koahiek;
 kumwail rong dahme I koasoakoasoia.
- ³ Kumwail kin ese kisin tungoal mwahu ni amwail kin
 tungoale,
 ahpw kumwail sohte kin ese mahsen en kup-
 wurokong ni amwail kin rong.
- ⁴ Eri, kitail me pahn pein kapwungala repenpwung wet.

- ⁵ Sohph kosekose me ih ohl mwakelekel men,
ahpw dene Koht sohte ketikihong eh tungoal
pwuhng.
- ⁶ E ahpw kalelapak, “Ia duwen ei kak likamw oh koasoia
me ngehi me sapwung?
I ohlahr kowahlap, ahpw sohte dipei.”
- ⁷ Mie aramas emen duwehte ohl menet, Sohph?
E sohte mwahn kin kasalehda eh wauneki Koht.
- ⁸ E kin perenki iang aramas suwed kan
oh ieiangseli me dipan akan.
- ⁹ E kin koasoia me sohte katepen
eh pahn idawehn kupwur en Koht.
- ¹⁰ Kumwail rong ie, kumwail aramas akan me dehdehki!
Koht Wasa Lapalahpie kak ketin wiahda sapwung?
- ¹¹ E kin ketin katingiheki aramas akan dahme re kin wia
oh ketin pwainohng irail duwen me konehng.
- ¹² Koht Wasa Lapalahpie sohte kin ketin wia me suwed;
e sohte kin ketin kupwur sapahrek ong emen.
- ¹³ Ia duwe, Koht kin ketin ale sapwellime manaman sang
rehn emen tohtohr?
Mie emen me patohwanohng en ketin apwahpwalih
sampah?
- ¹⁴ Ma Koht pahn pwurehng ketikihang engin mour,
¹⁵ eri, me mour koaros pahn mehla
oh pwurehng wiepwella.
- ¹⁶ Eri, komw karonge ie, ma komw me loalokong.
- ¹⁷ Komw kadekadeik sapwellimen Koht pwung?
Komw medemedewe me e kin ketin kalahdeki
pwuhng?
- ¹⁸ Koht kin ketin kadeikada nanmwarki kan oh kaun akan

- ma re suwed oh sohte kateparail.
- ¹⁹ E sohte kin ketin uhpalihki kaun akan
de uhki me kepwehpwe kan sang me semwehmwe
kan,
pwehki ih me ketin kapikada aramas koaros.
- ²⁰ Aramas emen kakete mehla karuaru nipwong.
Koht kin ketin kaloke aramas, re ahpw kin sohrala;
e kin mengeiong ih en ketin kemehla me lapalap
akan.
- ²¹ E kin ketin mwasamwasahn kahk koaros me aramas kin
wia.
- ²² Sohte rotorot ehu
me kak ekihsang aramas dipan emen mwohn silan-
gin Koht.
- ²³ Koht sohte kin ketin kilelehdi ahnsou ehu
pwe aramas akan en patohla pahn kupwure oh ale
kopwung.
- ²⁴ E sohte ketin anahne roporop ehu en wiawi
pwehn ketikihsang kaun akan nan dewerail oh wil-
iankihdi ekei.
- ²⁵ Pwehki e ketin mwahngih dahme re wiewia;
e kin ketin keseiraila oh tiakirailpeseng nipwong.
- ²⁶ E kin ketin kaloke me dipan akan wasa me aramas
koaros kak kilang,
²⁷ pwehki ar kin sohpeisang
oh soikala sawellime kosonned kan koaros.
- ²⁸ Re idingohng me semwehmwe kan en likweriong Koht,
oh e ketin karonge ar likwer en pek sawas.
- ²⁹ Ma Koht pahn ketin kupwurehda en dehr wia mehkot,
sohte emen kak kasapwunge ih.
Ma e pahn ketin karirihala silangi, e pahn sohla
sawasepen aramas.
- ³⁰ Sohte mehkot me wehi kan kak wia

pwe re en doareirailsang pahn kehnaudek en aramas akan me sohte ar Koht.

- ³¹ Sohp, komw sakarkidahngehr Koht dipomwi kan oh inoukihda me komw solahr pahn pwurehng wiahda dihp?
- ³² Komw peki rehn Koht en ketin kasalehiong komwi omwi sapwung kan, oh komw inoukihda me komw pahn tokedihsang wiewia me suwed?
- ³³ Pwehki omwi sohte pwungki dahme Koht ketin wia, eri, komw kasik en ketin kapwaiada dahme komw anahne?
Komwi me pahn wiewia met, kaidehn ngehi; eri, komw koasoiaiong kiht met dahme omwi lamalam.
- ³⁴ Aramas koaros me mie ar lamalam pahn pwungki; aramas loalokong men me pahn rong ie pahn koasoia
³⁵ me Sohp koasoakoasoi sang nan eh sawehwe oh mehkoaros me e koasoia me sawehwe.
- ³⁶ Kumwail medemedewe mehkoaros me Sohp koasoia; kumwail pahn tehk pwe eh koasoi kan mwomwen koasoi en aramas suwed.
- ³⁷ E kapatahiong dipe kan kahngohdi; e ahpw lahlahwe Koht mwohtail koaros.

35

- ¹⁻² Sohp, me sapwung omwi kin patohwan me komwi mwakelekel mwohn silangin Koht,
³ de kalelapak rehn Koht, “Dahme dipei kan wiahiong komwi?
Dahme I pahn paiehki ma I sohte wiahda dihp?”
- ⁴ I pahn pil sapeng komwi oh kompoakapahmwi kan.

- ⁵ Kumwail kilengdawohng pahnlahng! Kilang uwen ileile en depwek kan!
- ⁶ Ma kumwail pahn wia dih, e sohte kin kauwehla Koht. Ma kumwail wiahda sapwung pak tohto, met mie katepe ong Koht?
- ⁷ Omwi pwung kin sewese Koht? Sohte mehkot me Koht kin ketin anahne sang rehmwi.
- ⁸ Mehn mpomw me kin lokolongki dipomw kan, oh kamwahu me komw kin wia me kin sewesehda.
- ⁹ Ni ahnsou me aramas kin lokolok, re kin sengiseng; re kin peki emen en doaireiraila.
- ¹⁰ Ahpw re sohte kin sohpeiong Koht, me ketin wiairailda, me kin ketikihong irail koapworopwor nan arail ahnsou apwal.
- ¹¹ Re sohte kin sohpeiong Koht, me kin ketikihong kitail kupwurokong, pwe kitail en loalokong sang mahn de menpihr.
- ¹² Re kin peki sawas, ahpw Koht sohte kin ketin sewese irail, pwehki ar aklapalap oh suwed.
- ¹³ Sohte katepen arail pahn likwer oh peki sawas; Koht Wasa Lapalahpie sohte pahn ketin karonge de mahsanih irail.
- ¹⁴ Soh, komw patohwan me komwi sohte kak patohwan Koht; ahpw kanengamah awiawih—omwi repenpwung miher mwohn silangi.
- ¹⁵ Komw medemedewe me Koht sohte pahn ketin wia sapwellime kalokolok, ma e sohte kin ketin tehk mwahu dih.

- ¹⁶ Sohte katepen omwi pahn usehla omwi koaso kan;
 e sansal me komw sohte wehwehki dahme komwi
 koasoakoasoia.

36

- ¹⁻² Kanengamahiong ekis mahs oh rong ie,
 rong dahme I pahn patohwan ni mwaren Koht.
- ³ I ese soahng tohto oh I pahn doadoahngki dahme I ese
 pwe I en kasalehda me Koht, me ketin kapikiehdao,
 me pwung.
- ⁴ Sohte mehkot me I pahn patohwanohng komwi pahn
 likamw;
 ohl loalokong mehlel men me patopato mwohmwi.
- ⁵ Ia uwen roson en Koht! E sohte kin ketin kalahdeki
 emen;
 sohte mehkot me e sohte ketin mwahngih.
- ⁶ E sohte kin ketin mweidohng me dipan akan en mour
 werei,
 oh e kin ketin kupwurehki me semwehmwe kan
 pwuhng.
- ⁷ E kin ketin sinsile me pwung kan;
 e kin ketin mweidohng irail en kaunda wasa duwehte
 nanmwarki kan
 oh kupwurehda pwe re en waunla kohkohlahte.
- ⁸ Ahpw ma aramas kin selikihdi sel mete,
 wie lokolongki mehkan me re wiadahr,
⁹ Koht kin ketin kasalehiong irail diparail kan oh ar
 aklapalap.
- ¹⁰ E kin ketin kupwurehda pwe re en rong sapwellime
 kapehm kan
 pwe re en sohpeisang me suwed.
- ¹¹ Ma re pahn peikiong Koht oh uhpah,
 re pahn paiamwahu oh popohl.
- ¹² Ahpw ma soh, re pahn mehla nan ar pweipwei

oh kotehla piletik me kolahng nan sapwen me melahr akan.

- ¹³ Irail kan me sohte ar Koht kin lingeringer poatopoaat,
oh mehnda ma re ale lokolok, ahpw re sohte kin kapakap oh peki sawas.
- ¹⁴ Re kin mehla ni ar wie pwulopwulte,
oh ohkihla kowahlap mour kanamenek.
- ¹⁵ Ahpw Koht kin ketikihong aramas lokolok pwehn wia padahk ehu ong irail,
oh ketin doadoahngki apwal pwehn kamwakidada kapehdirail kan.
- ¹⁶ Koht ketikihsang komwi nan apwal,
oh ketin mweidohng komwi en pereperenki omwi paianwahu;
omwi tehpel direkihla kisin tungoal akan.
- ¹⁷ Ahpw met, komw aleier lokolok me konehng komwi.
- ¹⁸ Komwi kanahieng pwe komwi dehr lohdi pahn pweip-wei sapwung,
de kepwehpwe en kahrehiong komwi en pwupwula.
- ¹⁹ E sohte pahn wia kamwahu ehu ong komwi en peki sawas;
omwi kehl koaros met solahr kak sewesei komwi.
- ²⁰ Komw dehr kasik pwohng en leledo,
ni ahnsou me wehi kan pahn ohla.
- ²¹ Kanahieng dehr sohpeiong me suwed;
komwi aleier lokolok pwehn sinsilei komwi sang me suwed.
- ²² Tamataman ia uwen lapalap en sapwellimen Koht man-aman;
iei ih sounpadahk me keieu lapalap sang koaros.
- ²³ Sohte me kak patohwanohng Koht dahme e pahn ketin wia

- de kapwukohneki me ih me wiewia me suwed.
- ²⁴ Kapingpen sapwellime wiewia kan kin wiawi ahnsou
koaros;
komwi uhdahn pahn pil kapinga ih.
- ²⁵ Aramas koaros kilangehr wiepen nin lime kan;
ahpw kitail kin kilangete sang wasa doh.
- ²⁶ Kitail sohte kak wehwehkihla sapwellime lapalap ni
unsek
de tohtohn sapwellime sounpar akan.
- ²⁷ Iei ih Koht me kin ketikhsang pilen sampah
oh kawekiong ni dingiding en keteu.
- ²⁸ E kin ketin kamwrehdihsang keteu nan depwek
pwehn kalamwurih aramas koaros.
- ²⁹ Sohte me wehwehki mwomwen mwekid en depwek kan
de mwomwen ngirisek en nansapwe
nan depwek, wasa me Koht kin ketiket ie.
- ³⁰ E kin ketikihdo piripir en lioal wasa koaros nan depwek,
ahpw kepin nan madau kin wie rotorotete.
- ³¹ Metiei duwen eh kin ketin katungoale aramas
oh ketikihdo reken kisin tungoal.
- ³² E kin ketin kolekihdi nin lime piripir en lioal,
oh ketin mahsanihong en kolahng wasa me e kup-
wurki.
- ³³ Nansapwe kin pakairkihdo melimel me kohkohdo,
oh kou kan kin ese me e pahn melimel.

37

- ¹ Melimel kin kasaloweihda.
- ² Kumwail rong, kumwail koaros, duwen kapitien Koht,
ngirisek en nansapwe me peipeido sang nin doause.
- ³ E kin ketin kadar lioal pahnlahng,
sang apali sampah kolahng apali.
- ⁴ Eri, kapitie ahpw kin sansalada,

- ngihl kamasapwehk en nansapwe,
nindokon lioal eh kin wie piripir.
- ⁵ Soahng kapwuriamei kan kin wiawi ni ahnsou me Koht
kin ketin mahsen,
soahng kaselel kan me kitail sohte kak en dehdehki.
- ⁶ E ketin mahsanih sinoh en mweredi pohn sampah,
oh ketikihdo keteu mwuledek.
- ⁷ E kin ketin katokihedi en aramas akan doadoahk;
e kin ketin kasalehiong irail dahme e kak wia.
- ⁸ Mahn lawalo kan kin pedolong nan imwarail kan.
- ⁹ Engin melimel kin ipisang palieir,
oh wahdo kisinieng kopou sang paliepeng.
- ¹⁰ Engin doaesens Koht kin kalamwurihala pihl akan,
oh wiahkihla aihs.
- ¹¹ Lioal kin piripir sang nan depwek
¹² ni ar kin mwekimwekidki kupwur en Koht.
Re kin kapwaiada soahng koaros me Koht kin ketin mah-
sanih,
wasa koaros nan sampah.
- ¹³ Koht kin ketikihdo keteu nin sampah;
mweinele e ketikihdo pwehn kalokehki aramas akan,
de en kasalehiong aramas sapwellime
kupwuramwahu.
- ¹⁴ Nennenla ekis ahnsou, Soh, oh rong mahs;
medemedewe soahng mwahu kan me Koht ketin
wiadahr.
- ¹⁵ Komw ese ia duwen Koht eh kin ketin koasoanehdi
oh kupwurehda lioal en piripirsang nan depwek kan?
- ¹⁶ Komw ese ia duwen depwek eh kin tangatang pah-
lahng,
wiepen nin limen Koht kapwuriamei?
- ¹⁷ Soh, pwe ihte komw kin lokolongki karakar

- ni ahsou me kisinieng en palieir kin kahpwalihala sahpu.
- ¹⁸ Komw kak sewesehki Koht wiepen pahnlahng oh kamelengilengihala duwehte mete melengileng?
- ¹⁹ Komw padahkihong kiht dahme se pahn patohwanohng Koht;
sohte audepen at lamalam; sohte mehkot se kak patohwan.
- ²⁰ I sohte pahn peki I en pato pahn kupwur en Koht;
dahme I pahn patohwankihong ih ahsou mwahu pwe en kauweiehla?
- ²¹ Eri, met marain en pahnlahng inenen lingaling,
me kamahl ong kitail en kilenglahng;
oh pahnlahng kin mwakelekelkihda kisinieng.
- ²² Lingaling kin pwarada paliepeng,
oh lingan en Koht kin kadirehkinkitailla lammwin kowahlap.
- ²³ Sapwellimen Koht manaman me lapalahpie kahrehda kitail sohte kak kerenlahng;
ih me ketin pwung oh mehlel nan sapwellime wiewia kan ong aramas.
- ²⁴ Ihme kahrehda, aramas koaros kin lemmwiki ih,
oh e kin pohsehse koaros me kin kosekose me irail me loalokong.

38

KAUN-O ketin Sapeng Sohp

¹ KAUN-O eri ketin sapeng Sohp sang nan melimel ehu, mahsanih.

KAUN-O

² Ihs kowe me peikasalki koasoandi kan en ei kupwurokong
sang nan omw koaso en pweipwei oh soh audepe?

- ³ Eri, ma kowe ohl emen, a uhda
oh sapeng peidek kat me I pahn wiahong uhk.
- ⁴ Ke mihmihki ia, ahnsou me I kapikada sampah?
Sapeng ie, ma ke me loalokong.
- ⁵ Ke ese ihs me koasoanediong sampah mwomwe?
Ihs me sohngediong powe mehn sohngpe?
Ia duwe, ke ese ihs me wiahda mepwukat?
- ⁶ Dahme kin kolokol uhr kan me kin utungada sampah?
Ihs me kin koasoanehdi takai me wia pwukakeimw
en sampah?
- ⁷ Nin sohrahn en tepin ahnsowo usu kan wiakihteieu
kokoul,
oh sapwellime tohnleng kan ngisingiski ar peren.
- ⁸ Ihs me katekatenge oh kolokol perehpen madau,^m
ni ahnsou me e kusukusupekda sang nan kapin sam-
pah?
- ⁹ Iei ngehi me koaduhpwalkihdi madau depwek kan
oh kipekihdi rotorot mosul.
- ¹⁰ Ngehi me kilelehdi irepen madau
oh kolokol nan dewe.
- ¹¹ Ngehi me mahsanihong madau, “Ke pahn lelete wasaht,
ke sohte pahn daulihala!
Omw pwuki kan pahn sawapeseng oh tokedi
wasaht.”
- ¹² Soh, mie pak ehu nindokon omw mour nin sampah wet
me ke kamarainipeseng rahn?
- ¹³ Mie pak ehu me ke koasoanehdi pwe marain en
dakarada imwin sampah,
de itikada aramas suwed kan sang wasa me re kin
rukuruk ie?
- ¹⁴ Marain en rahn kin kasalehda dohl oh wahu kan,

38:7: Par. 3.34. ^m 38:8: KOLOKOL PEREHPEN MADAU: Tehk 26.12.

38:8: Ser. 5.22.

duwehte likou limilim ehu.
sansal duwehte nting ehu pohn pwehl.

- 15 Marain en rahn nohn lingaling ong aramas suwed akan,
oh kin karompwahsang irail en kapwaiada ar tiahk
suwed koasukloal kan.
- 16 Ke iangehr mi ni pwarer kan en nan madau kan?
Ke iangehr keid nan kepin madau?
- 17 Mie me kasalehionguhkehr wenihmw kan
me kin perepere sahpw rotorot en me melahr akan?
- 18 Ke dehdehki uwen laud en sampah?
Eri, ma ke dehdehki mepwukat koaros, a sapeng ie
oh ndahdo.
- 19 Ke ese ia wasa marain kin kohsang ie,
de tepin rotorot?
- 20 Ke kak kasalehiong ira ididien wasa ira kak lel,
de kapwureiradohng wasa ira tepisang ie?
- 21 I uhdahn ese me ke kak, pwehki omw mahsang ira,
oh omw ipwidi mwohn sampah eh saikinte wiwi-
hda!
- 22 Ke pwaralahngehr ni imwen nahk kan,
wasa I kin nekinekid ie sinoh oh keteu aihns takai?
- 23 I kin nekinekidohng ahnsou apwal akan,
ahnsoun pei oh mahwen.
- 24 Ke iangehr mi wasa ketipin kin dakada ie,
de wasa me angin palimese kin ipido sang ie?
- 25 Ihs me weirada dewen keteu mosul me kin mwerediong
nansapw,
oh koakoahda elen melimel?
- 26 Ihs me kin kamwrehdi keteu wasa me sohte towe?
- 27 Ihs me kin kalamwurih sahpw madekeng kan,
pwe dihpw en kak wosada ie?

- 28 Mie semen keteu de semen pwoaik?
 29 Ihs me naitikihada aihs oh sinoh,
 30 me kin kahrehiong pihl eh kekeluwakala,
 oh pahnsed wia-aihsla?
- 31 Ke kak salihpene usu kan me adaneki Pliadis,
 de sapwadada selipen Oraion kan?
 32 Ke kak kaweid mwekimwekid en usu kan
 me adaneki Pehr Laud oh Pehr Tikitik?
 33 Ke ese duwen koasoandi kan en mwekid en pahnlahng,
 oh ke kak kawehwehda lipwen koasoandi pwukat
 pohn sampah?
- 34 Ke kak wering depwek kan,
 pwe re en koaduhpwalkinuhkedi pilen keteu?
 35 Oh ma ke koasoanediong lioal en pir,
 e pahn dukiong uhk oh nda, “Iet ngehi, I pahn
 kapwaiada”?
- 36 Ihs me kin ndaiong menpihr me adaneki ipisⁿ me Pillap
 Nail pahn lapakehda,
 de kihng kan me e pahn keteuda?
 37 Ihs me nohn kupwurokong pwe en wadekedi depwek
 kan,
 oh kamwrehdi keteu,
 38 keteu me kin kapasapene pwelpar en sampah oh
 kakeluwakihala?
- 39 Ke kin rapahkihong kenen laion kisin mwenge,
 oh kansenamwahwihkihla kisin mwengeo nah kan,
 40 nindokon ar kin rukuruk nan dewerail,
 de wonohn awiawih nan pasarail?
 41 Ihs me kin kamwenge menin pahnlahng kan,

38:31: Soh p 9.9; Eimw. 5.8. ⁿ 38:36: IPIS: Menpihr en kawa men nan
 Isip me aramas akan kin kamehlele me dene e kin pakairkihong irail me Pillap
 Nail pahn lapake.

ni ar kin pipihrseli reperepen kisin mwenge,
ni neirail kan ar kin liklikwerikin ie ar men
mwengedahr?

39

- ¹ Ke ese ahnsou me kuhten wel kan kin ipwidi?
Ke kin tehk duwen tiehn wel kan ar kin neitik?
- ² Ke kin ese wadek sounpwong en ar liseian,
oh ahnsoun ar pahn kin neitik?
- ³ Ke kin ese ahnsou me re pahn wendi
oh kaipwidi wahnedirail kan?
- ⁴ Ke ese duwen ar kin apwalih oh kakairada wahnedirail
kan nanwel,
oh duwen ar kin tohrohrala sang irail oh sohla
pwurodo?
- ⁵ Ihs me kihong saledek rehn ahsen nanwel kan?
Ihs me kin lapwairailda pwe re en kin sansaledekseli?
- ⁶ Ngehi me kihong irail dewerail nan sapwtehn,
oh nan mall akan pwe re en kin kousoan ie.
- ⁷ Re kin dohla sang mwoarong en kahnimw kan,
oh sohte me kak kamandairaila oh koadoadoahkih
irail.
- ⁸ Nahna kan, iei wasa re kin mwenge ie,
wasahn ar rapahki kanarail dihpw.
- ⁹ Ia duwe, kou lawalo kan pahn men doadoahkohng uhk,
de re pahn men kin pweidi nan dewen mahn akan
rehmw?
- ¹⁰ Ke kak salihedi tumwe oh doadoahngki pwe en deip-
welihada sapwomw,
oh kapatapatahla?
- ¹¹ Ke kak koapworopworki eh kehlail laud,
oh likihong omw doadoahk toutou kan?

- 12 Ke lemeleme me e pahn kapwarehdong uhk wahnsap-
womw,
oh kadirehla omw wasahn nahk pila, kadirehkihla
wahn pilawa?
- 13 Ia uwen pitipit en likapip en soangen mahn me adaneki
ostris!
Ahpw sohte ostris men kin kak pihr duwehte
sidoahk.
- 14 Ostris kin kutoahrdiong nanpwel,
pwe karakar en pwehl en kin sewese kasawa eh
kutoahr kan.
- 15 E kin sasairki me kutoahre kan kak tiatipeseng,
oh mahn lawalo kan kak kangala.
- 16 E sohte kin tehk kutoahre kan,
oh sohte kin nsenohki ma sohte epwelparail.
- 17 Eri, iei ngehi me wiahda en kin mwomwen pweipwei,
oh I sohte kihong en loalokong.
- 18 Ahpw ni eh kin tapihada tang,
e marahrahsang oahs me aramas kin dake.
- 19 Ih kowe, Soh, me kin kihong oahs akan ar kehlail,
oh kin kalinganahki pohn tepinwararail wune kan?
- 20 Ih kowe me kin kalus irail, rasehng loukust kei,
oh kamasangki aramas akan ngilen nan tumwarail?
- 21 Re kin sarepki pehrail pwehl en nan wahu kan,
nan mahwen re kin tenge ar imwintilhti kan ni uwen
ar kehlail.
- 22 Re sasairki dahkot masak,
oh sohte kedlahs pwoat kak kapweiekiraildi.
- 23 Tehtehn mahwen kan rehn soundake oahs akan
kin ngirisek oh pipir nan wehwe.
- 24 Ni ahr kin rereki pingiping en moromor, Oahs akan kin
wenlahte mwowe;

- ni ngilen sewi eh kin pepeuk, sohte me kak kapweiekiraildi.
- ²⁵ Ni ar kin rongada ngilen sowi,
re kin sapengki ngilen nan tumwarail.
Ni arail dohsang mahwen, re kin kehnda dahpekpenehn
karis kan,
oh re kak rong ngilen koasoandien kaunen sounpei
kan.
- ²⁶ Ia duwe, kowe me padahkihong likoht mwomwen eh
pahn pihr,
ni eh kin kihpeseng peh kan pwe en pihrlahng
palieir?
- ²⁷ Ih kowe me kin koasoanehdi pwe ikel kan
en wiahda pasarail kan wasa ilehn nahna kan?
- ²⁸ Pasarail kan kin wiawihda pohn paip keieu ile kan,
oh dewerail kan kin mi ni kumwen nahna apwal kan.
- ²⁹ Sang wasah ko re ahpw kin ireirong wasa keren oh wasa
doh kan,
dahme re kak saihngkihdi kanarail.
- ³⁰ Wasa me mehla men kin mi ie, re kin pokonpeneie
oh kisin ikel tikitik kan kin medkihla ntahn me mehla
kan.

40

- ¹⁻² Sohp, ke peliandahr Koht, Wasa Lapalap;
Ke pahn nennenlahr met, de ke pahn sapeng ie?
- Sohp*
- ³⁻⁴ Maing KAUN, ei pato kat patohn pweipwei men. Dahme
I kak sapengkin komwi?
Pwe sohte.
- ⁵ Ei pato me laudsang me konehng.

⁶ Eri, KAUN-O ahpw ketin pwurehng mahseniong Soh
sang nan melimelo, mahsanih,
KAUN-O

⁷ Ma kowe ohl emen, kesihnenda
oh sapeng ei peidek kat.

⁸ Ke songosong kadehdehda me ngehi me sapwung—
ke wiahki me ngehi me sapwung oh kowe me pwung?

⁹ Ke me kehlail duwehte ei kehlail?
Ngilomw en kak ngirisek en nansapwe duwehte
ngileiet?

¹⁰ Ma iei, a uhda, kawauwihukala oh kaileiukada;
kapilkinuhkpene roson oh lingan.

¹¹ Ke ahpw kilang irail kan me kin aklapalap;
kauwong irail angin omw lingeringer oh
kasaroweiraildi.

¹² Ei, tehk mwahu duwen irail oh kasapwiliraildi;
kamwomwala me suwed akan wasa koaros me re mi
ie.

¹³ Sarepedi irail koaros pahn pwehl;
salihiraildiong nan sapwen me melahr akan.

¹⁴ Eri, I ahpw pahn tapihada kapingaiuk,
oh pohnese me pein kowe me pweida.

¹⁵ Ke kin kilang soangen mahn kamasepwhehk me adaneki
Pehemod?o
Ngehi me wiahda duwehte ei wiaiukada.

E kin kang dihpw duwehte kou kan,
¹⁶ ahpw ia uwen kehlail en paliwere,
ia uwen kehlail en kapehde!

¹⁷ Pwadaike kin uhda, likamw tuhke sidar pwoat;
selen neh kan rasehng sel mete kehlail.

¹⁸ Tih kan rasehng prons,

O 40:15: PEHEMOD: Ekei aramas medemedewe me mahn menet duwehte
hippopotamus, ekei kin medemedewe me mahn en kawa men.

oh neh kan rasehng lepin mete kei.

- 19 Mahn keieu kapwuriamwei rehn mahn koaros me I
wiahda!
Ihte Sounwiepeo me kak powehdi.
- 20 Dihpw me e kin kangkang pwe en keirkihda kin wosada
pohn dohl kan,
wasas me mahn lawalo kan kin mwadomwadong ie.
- 21 E kin mihmi pahn mwetehn tuhke tekatek kan,
oh kin rukuruk nan welin ahlek kan nan lehpwel kan.
- 22 Tuhke tekatek kan oh tuhke me kin wosada pohn keilen
pihl kan
kin pwainkihdi mwetehr kan.
- 23 E sohte kin masak ahden pillap,
e kin nennenlahte ma pilen Sordan kin lapakehda lel
ni mese.
- 24 Ihs me kak karotongehla mese oh saikidi?
De ihs me kak koledi mahn menet nan eh lidip? Kin
liklikwerikin ie ahr men mwengedahr?

41

- 1 Ia duwe, ke kak apihada Lepaiadan,^p
de salihkihdi sellap pwoat lowe?
- 2 Ke kak kihong sahl pwoat nin tumwe,
de kehs ehuh nan ewe?
- 3 E kak peki rehmw ke en sapwadala,
de ke en mahkohng?
- 4 E kak en inoukihong uhk mehkot,
de inoukihda me e pahn papahiuk kohkohlahte?
- 5 Ke kak wiahki ih noumw kisin mehn mwadong kis,
me ke pahn kin kaperenehki serepein kan me kin
papahiuk?

- 6 Soused kan pahn netki ni pweimwahu?
 Sounnetinet kan pahn pwalangpeseng pwe re en
 netikihla?
- 7 Ke kak kadirehkihla kili ketieuwen soused kan,
 de doakoahki moange ketieu pwoat?
- 8 Song sair pakteieu, a ke solahr pahn pwurehng
 kohkohlahte;
 ke sohte kak manokehla uhpene wet!
- 9 Mehmen me kin kilang Lepaiadan,
 kin sohla angi oh kin pwupwudiong nanpwel.
- 10 Ni mahn menet eh kin kesihnenda, me inenen mas
 kamasepwehk;
 sohte me kin men uhda mwowe.
- 11 Ihs me kak uhwong ahpw pitlahsang?
 Sohte nin sampah me kak wia met.
- 12 I pahn padakihong uhk duwen nehn Lepaiadan,
 oh koasoiahda uwen kehlaile en paliwere.
- 13 Sohte me kak tehrasang kidip en paliwere,
 de kauwehkihla kili tehtehn pei.
- 14 Ihs me kak kasarapeseng ewe,
 me ngih kamasepwehk kei kapilpenehr?
- 15 Pohntihnsewe, irek en wunen mwomw kei me wia,
 paspene oh kekeluwak duwehte takai.
- 16 Ehute pasehng meteio oh keirekpene;
 sohte kisinieng kis kak duwal nanpwung.
- 17 Koaros inenen patpene oh keirekpene;
 sohte mehkot kak kamweidirailpeseng.
- 18 Ni eh kin asi, marain kin pirieisang nan tumwe,
 oh pwoaren mese kan kin lingaling, rasehng
 dakedahn ketipin.
- 19 Mpwulen kisinieie kin lulsang nan ewe,
 rasehng mwoalus mwehl en nan uhmw.

- 20 Ediniei kin uh sang nan pwoaren tumwe,
rasehng edin tuwi me lullul pahn einpwoat.
- 21 Angin eh esingek kin sounda kisiniei,
mpwulen kisiniei kin uh sang nan ewe.
- 22 Eh kehl unsek mihmi nin tepinwere,
masepwehk kin kipehdi koaros me kin tuhwong.
- 23 Sohte wasa kis muterek ni kili,
pwe me kekeluwak oh apwal duwehte mete.
- 24 Nan eh mohngiong sohte masak kin dierek ie,
pwe me apwal oh kekeluwak duwehte takai.
- 25 Ni eh kin pwourda oh uhda, koht akan pil kin masep-
wehkada,
pwehki ar masak, e kin sohla angirail.
- 26 Sohte kedlahs pwoat kak kalipwelipwehda;
sohte ketieu pwoat, de arep pwoat, de lepin seipali,
kak kauwehla.
- 27 E kin wiahki mete diper en tuhke,
oh prons mehkot kopwukopw reh, rasehng tuhke
mwoasoangot.
- 28 Sohte kesik keteiu me kak kasalowehta pwe en tang-
doai;
takai kan me pahn koasuk, rasehng diper en dihpw.
- 29 E kin wiahki mehn wowoki kan kisin diper en dihpw,
oh e kin kouruhrki ketieu kan me aramas kin
doakoahki.
- 30 Kapehde rasehng pwoatol ohla kei me keng;
ni eh kin limwahdek, e kin pwalangpeseng pwehl
muterek kan rasehng mehn ruwahdek me mete mi
pahn kapi.
- 31 E kin kamwekidada nansed duwehte einpwoat pwoap-
woail ehu,
oh kin kapwudopwudehda duwehte ketel en leh ehu.
- 32 Ni eh kin tangatang kohla, lipwe kin wiahda ahl lingal-
ing ehu.

oh e kin kadirehkihla nansed pwudopwud pwetepwet.

³³ Sohte mehkot nin sampah me kak karasarasohng,
pwe mahn emen ih me sohte kin masepwehk.

³⁴ E pil kin mwamwahliki mahn me keieu lapalap akan,
pwe ih me nanmwarkien mahn lawalo koaros. nan
welin ahlek kan nan lepwel kan.

42

¹ Sohp eri sapeng KAUN-O, patohwan,
Sohp

² Maing KAUN, I patohwan ese me komwi me ketin manaman ong wia mehkoaros,
oh komw kin kak ketin wiahda mehkoaros me komw
kin ketin kupwurki.

³ Komw ketin keinemwe ia duwen ei kak peikasalki sapwellimomwi kupwurokong,
ni ei sohte mwahn audaudki mehkot.

I patohwandahr duwen soahng kapwuriamwei
oh lapalap akan me I sohte dehdehki.

⁴ Komw mahsanihong ie I en patohwan rong komwi
nindokon omwi mahmahsen,
oh I en song sapeng sapwellim keinemwe kan.

⁵ Eri, mahso I patohwan esehte dahme aramas teikan
patohwanohng ie,
a met I pein patohwan kilangkinkomwiher mesei kat.

⁶ Iei me I patohwan namenengkilahr mehkoaros me I
patohwandahr,
oh I koluhlahr nan pwelpar oh pehs pwukat.

Kaimwiseklahn Koasoiepen Sohp

⁷ Mwurin KAUN-O eh ketin mahsanihong Sohph mep-wukat koaros, e ahpw mahsanihong Elipas, “I engieng laud pahmw oh pahn kompoakepahmw riemenen, pwehki amwail sohte koasoiada me mehlel duwen ngehi duwehte me ei ladu Sohph wia. ⁸ Eri met, kumwail ale kouwol isimen oh sihpw wol isimen oh wahwei rehn Sohph; kumwail ahpw meirongkihong ie ni adamwail. Sohph ahpw pahn kapakapkin kumwail, oh I ahpw pahn karonge eh pekipek oh sohte keriaikumwailla duwen me konehng kumwail. Pwe kumwail sohte koasoiada me mehlel duwen ngehi, duwehte me ei ladu Sohph wia.”

⁹ Elipas, Pildad, oh Sopahr eri kapwaiada me KAUN-O ketin mahsanihong irail. KAUN-O eri ketin karonge en Sohph eh kapakap.

¹⁰ Eri, mwurin Sohph eh kapakapki kompoakepah silimeno, KAUN-O ahpw ketin kapaiamwahwihala sapahl Sohph, oh ketikihong uwen tohtohn dipwisou pak riapak me e ahneki mahso. ¹¹ Rien Sohph pwutak oh serepein ko koaros, oh kompoakepah ko koaros en mahs, ahpw pwarodo reh ni imwe oh wiahda lapalahn kamadipw ehu. Re ahpw kamwait oh kasenamwahwihala sang apwal koaros me KAUN-O ketikihong. Emenemen irail eri kiskisehki kisin mwohni oh kisin rihng kohl.

¹² KAUN-O eri kupwuramwahwihala luhwen ahnsoun mouren Sohph, ketikihong dipwisou tohtohsang mehn mahs ako. Pwe Sohph nainekihla sihpw 14,000, kamel 6,000, kou 2,000, oh ahs 1,000. ¹³ E pil nainekihla pwutak isimen oh serepein silimen. ¹⁴ E kihong eden serepein

me laudo, Semihma,ŀ eden me keriemeno Kesia, oh me keieu tikitiko, Keren-appuk. ¹⁵ Sohte lih emen nin sampah pwon me kaselel oh masamwahu duwehte nein Sohp serepein ko. Arail pahpao eri pil kihong irail ar sohso duwehte me e kihong en nah pwutak ko.

¹⁶ Sohp eri momourki sounpar 140 mwurin met, e koanoahdi oh kilang nein nah seri kan, oh nein nah seri kan nair seri kan. ¹⁷ Mwuhr, e ahpw mehla ni eh ohl laudlahr mehleh.

ŀ 42:14: Sisen oh wehwehn eden nein Sohp serepein ko ni mahsen en Ipru kasalehda duwen ar kaselel, SEMIHMA wehwehki “mwuroi”, KESIA wehwehki “kasia” eden tuhke pwohmwahu ehu; oh KEREN-APPUK iei kisin kohpwa kis me lih akan kin kihong mehn kapwata masaraail kan loale.

Pohnpeian Bible with Apocrypha
The Holy Bible in the Pohnpeian language of the Federated States of
Micronesia

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-09-08

PDF generated using Haiola and XeLaTeX on 13 Mar 2019 from source files dated 13 Mar 2019

7ff9a0a6-6024-5540-a190-762a68918ebc